


義烏縣志

五之七上




							漢書門
			九	一〇	八	九	
一〇	二	四	九				
冊	架	函	號	類			

庫	文	閣	內
九	九		漢
二	〇		書
函	一		
一	八		
三	〇		
架	冊	號	類

內閣文庫	
番號	漢 9089
冊數	10 (3)
函號	292 78

三



義烏縣志卷之五

祠祀志

秩祀

延祀

合祀

專祀

思祀

丘墓

秩祀

淺草文庫

此所謂封內山川社稷城隍神祇有功烈於民能捍
大災禦大患歲食報於一方者而神宇之相延而祀
向載寺觀者附之其國故之卓垂不朽或合祀或專

祀者次之前令之去思者又次之并及丘墓焉各為
標目而巫祝桃茆之設弗書特府志癸星諸祠廟次
永慕諸廟祠後丘墓次坊表舊志次寺觀差不同耳

社稷壇

壇在縣西迎恩門外一百步祀縣社縣稷之神

社以祭土

稷以祭穀卽古者春祈秋報方社先農之祭也唐制無考宋壇在縣西一里三百四十步大觀三年知縣徐秉哲徙縣北一百八十步元大德十年縣丞鄭應徙於金華門外一百步明洪武十一年知縣孔克源遵制卽元舊址建壇其制東西南北各二丈五尺高

三尺四出陛各三級壇下前九丈五尺東西南各五丈立石主長二尺五寸方一尺埋壇南正東去壇二尺五寸止露圓尖餘埋土中祭以木爲神牌二縣社之神縣稷之神歲以春秋仲月上戊日致祭用羊二

豕二帛二爵三登一釧二籩豆各四簋簋各二樂用

鼓吹惟長官一員祭服行三獻禮餘官止陪祭

祝文 昭告于某神曰品物資生烝民乃粒養育之

功司土是賴惟茲仲

春禮宜

秋禮宜 報祀謹以牲帛醴齊粢

盛庶品式陳明薦尚享祭畢焚祝帛坎中以土實坎

藏主於房本縣每祭實用銀七兩三錢八分五釐

風雲雷雨山川壇

壇在縣南四里祀風雲雷雨山川之神并城隍之神

合祭

唐制無考宋與社稷爲一後另立風師壇雷雨師壇元址在金華門外一百步明洪武初始以

山川與社稷分祀後以風雲雷雨并城隍合祭壇一而設二位中爲風雲雷雨之神左爲境內山川之神右爲城隍之神七年知縣張永誠徙壇址於縣南四里十一年知縣孔克源改建壇歲以春秋仲月上巳日致祭用羊三豕三帛七爵三登一劔二籩豆各四簠簋各二樂用鼓吹儀注與社稷同祝詞改云惟神妙用神機生育萬物奠我民居足我民食某等欽承上命忝職茲土今當仲春謹具牲醴庶品用申嘗祭尚享本縣每祭用銀一十一兩一錢一分五釐

邑厲壇

壇在縣西北一百八十步祀無祀鬼神

唐宋無考明洪武三年始

定於宋社稷壇故址去縣北一百八十步今城隍廟後

歲以春清明日秋七月

十五日冬十月朔日先期牒告城隍屆期迎城隍神

位於壇以爲主旁列無祀鬼神分男女東西致祭用

羊三豕三果四羹飯餘品冥衣數百具

祭文某年某月日某縣官某遵奉禮部劄付爲祭祀

本縣闔境無祀鬼神等衆事該欽奉皇帝聖旨普天

之下后土之上無不有人無不有鬼神人鬼之道幽

明雖殊其理則一故天下之廣兆民之衆必立君以

主之君總其大又設官分職於府州縣以各長之各
府州縣又於每一百戶內設一里長以綱領之上下
之職綱紀不紊此治人之法如此天子祭天地神祇
及天下山川王國各府州縣祭境內山川及祀典神
祇庶民祭其祖先及里社土穀之神上下之禮各有
等第此祀神之道如此尚念冥冥之中無祀鬼神昔
爲生民未知何故而歿其間有遭兵刃而橫傷者有
死於水火盜賊者有被人取財而逼死者有被人強
奪而妻妾死者有遭刑禍而負屈死者有天災流行

而疫死者有爲猛獸毒蟲所害者有爲饑饉凍死者
有因戰鬪而殞身者有因危急而自縊者有因牆屋
傾墮而壓死者有死後無子孫者此等鬼魂或終於
前代或沒於近世或兵戈擾攘流移於他鄉或人烟
斷絕久缺其祭祀姓名泯沒於一時祀典無聞而不
載此等孤魂死無所依精魄未散結爲陰靈或倚草
附木或作爲妖怪悲號於星月之下呻吟於風雨之
時凡遇人間節令心思陽世魂杳杳以無歸身墮沈
淪意懸懸而望祭興言及此憐其慘悽故勅天下有

司依時享祭在京都有泰厲之祭在王國有國厲之祭在各府州有郡厲之祭在各縣有邑厲之祭在一里又各有鄉厲之祭期於神依人而血食人敬神而知禮仍命本處城隍以主此祭欽奉如此今某等不敢有違謹設壇於城北三月清明日七月十五日十月一日置備牲醴羹飯專祭本縣合境無祀鬼神衆等靈其不昧永享此祭凡我一縣境內人民儻有忤逆不孝不敬六親者有姦盜詐僞不畏公法者有拘曲作直欺壓良善者有躲避差徭虧損貧戶者似此頑惡姦邪不良之

徒神必報於城隍發露其事使遭官府輕則笞決杖斷不得號爲良民重則徒流絞斬不得生還鄉里若事未發露必遭陰譴使舉家並染瘟疫六畜田蠶不利如有孝順父母和睦親族畏懼官府遵守禮法不作非爲良善正直之人神必達之城隍陰加護佑使其家道安和農事順序父母妻子保守鄉里我等闔府官吏等如有上欺朝廷下枉良善貪財作弊蠹政害民者靈必無私一體昭報如此則鬼神有鑒察之明官府非諂諛之祭尙享本縣每祭用銀十兩

右凡諸祀典齋戒先為榜文書某省等處某官為
祭祀事照得某年月日某干之期例該致祭某神
前期三日獻官陪祭官并執事人等沐浴更衣散
齊二日各宿別室臨期致齊一日同宿祭所散齊
仍理事務惟不飲酒不食蔥韭薤蒜不弔喪不問
疾不聽樂不行刑不判署刑殺文字不預穢惡事
致齊惟
理祀事

里社壇

壇在各里祝五土五穀之神

洪武八年令縣每里一百戶內立壇一所遇

春秋二社里中父老備物祈報祭畢會飲先令一人
讀誓詞曰凡我同里之人各遵守禮法毋恃力凌弱
違者先共制之然後經官或貧無可贍周給其家

年不立不使與會其婚姻喪葬有乏隨力相助如不
從眾及犯姦盜詐偽一切非為之人並不許入會讀
畢長幼以次就坐盡歡而退務在恭敬神明和睦鄉
里以厚風俗

鄉厲壇

壇在各里祀無祀鬼神

洪武八年建每里設壇一所四圍土牆中築土臺一座門

立牌額書無祀鬼神壇

遇春秋各邑厲壇祭日里中父老隨鄉

俗置辦牲酒祭告城隍與本縣告文頗同屆期行禮

祭文

某縣某鄉某里某社某人承本縣官裁旨該

欽奉皇帝聖旨以下文與祭邑厲同今某等不敢有違謹設壇

於本里以三月清明日七月十五日十月一日率領某等百家聯名於

此置備羹飯餽物祭於本里無祀鬼神等衆靈其不

味依期來享凡我一里之中百家之內儻有忤逆不

孝以下並同邑厲祭文但無我等闔府官吏至一體昭報一欵如此則鬼神有鑒

察之明我民無諂諛之祭靈其無私永垂昭格尚享

其祭畢會飲讀誓等儀俱與祭里社同

城隍廟

廟在縣西北儒學右祀本縣城隍之神城隍之神舊無考惟唐李

陽冰有當塗城隍廟則神始於唐矣明洪武二年勅封鑿察司民顯佑伯十七年定禮制去封號直稱曰

義烏縣城隍之神歲無特祀春秋二仲上巳日合祭於山川

壇三厲祭則迎神主之凡有司初入境必先齋宿於

此陳牲告神而後到任禱祈水旱災眚必先牒告而

後立壇蓋以理幽一邑之主也舊址在縣南六十步

後徙于繡川門外三十步洪武三年知縣張永誠建

於今所正廟三間後堂三間東西廊各五間內門三

間外門三間鐘鼓樓東西各一間石坊一座邑人王宗聖鐘

鼓樓記聖天子御極之四十年辛酉夏四月島夷肆虐震盪海隅維時參將南塘戚公奉勅保釐台郡協

同監軍延陵趙公督我烏兵指授方畧殲厥醜類靡有孑遺爰是諸營總領陳大成丁邦彥率吳惟忠王如龍陳子鑾陳京等僉曰是役也我烏城隍之神恍若雲端叫號反風縱火默成之功懋焉請捐廩百金以崇神宇以答神休戚公曰然蠢茲倭寇犯我中原十年于茲神人共憤久矣况用兵以來全捷甚稀惟我烏兵一月之內凡水陸十戰十捷我兵損折僅七人至如花街白水長洋之役以寡臨衆全捷尤奇衣冠被鹵者二千餘一旦盡返故廬此固督府當道夙持成算兵士用命所致而神明之默佑者信不可誣昔安平假稱神師遂復齊七十餘城今爾多士其行也載神爲依其飲食也視神爲享其臨敵也咸奮然藉神爲威况中復有恍惚見其叫號則神之助我也實有明徵視齊反走之卒大逕庭矣今茲捐金以報鴻休以祈永佑也因宐乃遣中軍省祭官龔雲程賚金以董其役雲程奉命維謹鳩工聚財培土築基建鐘樓於廟門之左建鼓樓于廟門之右復建西廡凡五楹橫廊凡二楹梁棟榱桷煥然以新祀級垣墉翼

然以整繪畫塗堊爛然以章經始於八月戊辰越一月十有六日甲申工用告成邑之人士聚觀者皆譟神之威靈丕振而祠宇鼎新不可以無記徵文于余余惟國之大事在祀與戎而事神治民理一無二故崇德報功所以勸忠是誠激勸人心一大機也昔國初敗僞漢於鄱陽神嘗助捷誠意伯劉基請建祠以祀神今戚公復有是舉其殆曠世而相感者歟抑劉公功勒太嘗慶垂後裔至今以公爲元祀然則戚公之勲庸爵位不亦繼美於劉公也耶戚公諱繼光中牟人歷任南北屢立奇功真有古名將風趙公諱大河江陰人丙辰進士先任吾邑廉明仁恕民知向方今以大理寺評事遷按察司僉事云 萬曆二十四年三月二十八日風雹震盪垣宇傾頽兩廊俱

圯知縣周士英以齊禱輒應重加修葺坊民

陳文永 童子恭

王大英 陳思湯 龔惟相 朱懋寬

等爭出緡錢爲助撤其儀門三間更

剏之石砌磚發塗堊丹牖廟貌翼然改觀

國朝康熙二十二年知縣辛國隆重建鐘鼓樓於廟前

婺女星君祠

郡志以地為婺女之墟故祠在縣東五十步朝陽門屬縣咸祀之宋嘉定間知縣張

者卿跨街為閣奉星君像於其上即今朝陽門洪武中知縣孔克源重創後災燬知縣張拱北建

記畧婺以星名州星之澤州民者甚大宋宣和三年方臘反睦將陷郡統領劉光世討之兵次蘭谿未敢

進夢霞冠羽衣神趨之行且以病指告劉至盜黨就擒及謁星祠其像如夢中一指將墮開禧三年大水

先期告守土吏為備民不漂溺景定四年武義山寇為亂來犯南屯於溪南遇媼嚮履長數尺盜怪問之

媼曰城中入履皆如是耳盜驚散去元至元十三年郡既降復守元將高興怒欲屠城夢神喻以勿殺明

旦以火矢射觀矢返墮軍中見巨人坐城上濯足城南水中大駭遂下令諷民降不敢戮一人至正十六

年沿海翼兵自蘭谿夜叛還謀襲郡城神化婦人導叛兵食瓜田間食已皆昏迷失道至城而天已曙官兵有備遂伏誅此皆彰灼可徵之大者而疾癘旱陽之禱為尤驗固未易悉數也○全記載府志

延祀

東嶽行宮

縣西一百五十步繡湖心之花島祠東嶽帝君佐神曰六聖曰永定郡劉王皆有祠

在廡下六聖之一曰張太保宋乾道七年累封忠靖威顯靈祐英濟王明正統七年知縣劉同縣丞劉傑

命道會司重建萬曆十八年知縣金繼震命道會司王紹彰重建二十四年知縣周士英仍命重修今為

聖習儀之所

靈順行廟

縣西一百步市心一在朝陽門一在東江橋

赫靈行廟

縣境內稠山及所在有之祀宋侍郎胡公則嘗助王師殄巨寇廟食於鄉府志云奏

免衢婺丁身錢有功祀之黃潛記胡公仕宋為時
 名卿婺之永康實公鄉邑公嘗讀書方巖山中歿而
 為神發祥其處宣和間封祐順侯紹興末乃賜廟額
 者初封誥命中語也祐順之號既累加以嘉應福澤
 靈顯極于八字淳祐間遂進爵為公更號顯應尋加
 正惠寶祐初再加忠佑杭之南山龍井源公墓次有
 顯應廟勅命在焉廟不書賜額而以顯應名者因初
 進封之號也公本以助王師殄巨寇廟食于一鄉而
 其光靈無遠弗被能出雲為風雨農人皆以望歲者
 望於公凡村墟里社必為祈報之所故公之別廟布
 滿於郡境不啻數十百區其在吾烏傷之稠巖者里
 人方氏倡眾為之也宋初婺之第進士者自公之始
 也至其季年方氏有大冶丞應龍以進士起家而族
 日益大其子孫相率致力於祠事彌久弗懈者蓋亦
 視公為鄉先達而知所敬慕不徒效俚俗徼福於公
 而已廟之創造以至元二十六年重興以至正九年
 新廟告成以記來謁於潛日公之陰佑乎斯民而變
 化不測有以驚動其耳目者庸夫孺子皆能言之至

於公奮由一第歷事三朝十握州符六持使節選曹
 計省歷踐要塗晚以從官全身而退其有德於人有
 功於國與夫出處之大致非薦紳先生莫能言也願
 備著之潛竊惟公之官伐治行有傳在魏國韓公所
 修宋實錄而文正范公所撰公墓誌論次尤悉謹書
 而俾之使刻諸石且為之記其作廟之顛末附見于
 石背若郡志言公嘗奏免衢婺身丁錢民被其賜而
 為之立廟則傳與墓誌皆無所登載姑俟博洽之君
 子而考
 質焉

晏公行廟

縣西五里松門山邑人王仲言建鄉民水旱疾疫禱之輒應王紳記陰陽二氣屈

伸聚散於穹壤者莫非至理之所寓而至化亦未始
 不行乎其間也日月之所以明雨露之所以潤雷霆
 之所以威霜露之所以肅以至山川流峙鳥獸孳育
 草木榮悴無一不囿於其中况夫人身血氣之盛衰
 精神之完耗不由之者乎此鬼神之道所以為二氣
 良能而理之固有者也夫何世之好奇而喜怪者見

其眇昧非可以膚淺探賸往往附以妄誕之說鼓惑於人孰知其道固非言語所可盡者邪至於因其跡而起敬慕之心感其誠而致孚格之妙此又理之自然也若平浪侯晏公之神崇名重號顯於時異績冥助在于人而廟貌之設徧布宇內者亦豈過情哉義烏縣西五里曰松門原隰平衍風氣固密而聚落亦殷盛嘗有挾堪輿之術者謂其地雅宜神居適里人王仲言氏默有契感遂相基掄材創廟宇三楹間肖神像其中規度未完而卒仲言之季仲舉仲宗能承其志復直前構重門周以崇垣樹以名木而鄉人又風承雲集各效其力凡廟制之所宜有者無一不具起於洪武二十四年十二月庚申落成於二十八年二月戊寅既成第見士民歲時相與扶耄攜幼登拜歌呼其門絡繹不絕而晨香夕燈上以祝皇圖之萬年下以祈斯民之康泰者賢愚一志億兆同心於是此廟之設儼為其里之壯觀而神之報贖於遠近者亦昭昭不誣矣予惟鬼神之道既為造化之功用其所以孚於人者非可以智求非可以力得唯一念之

誠足以感之耳今觀王氏兄弟之寅恭祇奉閭閻士民之嚴威趨事其精慮潛通雖衡山之雲可以開閭祿之勢可以轉况神之靈妙在冥漠者如水泉之行不擇地而有乎第患人心靡終耳今因其請文為記故極論之庶使來者知所以焉若夫神之姓名里系顯靈在人心者類能言之茲不復述洪武二十八年三月朔日記

晏公廟 縣西平橋側宋南渡時李氏自河南遷奉為香火主洪武中始立廟於此世葺記之

順應廟 縣東北四十里清潭山下神姓樓稱之曰樓馱府君神兄弟三人有智勇為鄉里雄唐末

黃巢賊眾經其地府君率弟及鄉人禦之戰不勝恥為賊得遂自刃二弟相繼戰沒眾德之各于沒之地

廟祀銅坑與普濟院前乃二弟廟宋熙寧間賜廟額 府志淳熙十一年賜額

福濟廟 縣西四十里之根溪神姓錢名寄由浦江來居溪旁有山山上有廟在墓前淳祐二年因

息杭州火靈驗賜廟額封火應侯

轉龍廟 縣東二十五里汎村神姓宋氏本富陽人行化經義烏民為立廟歲災疫禱應

三山廟 縣南六十里三山之上祀本山之神鄉民疾疫禱之應驗

蜀山廟 縣南四十里野墅朱村村民共指為上祖或曰晉東陽太守朱垣臨海太守朱汎金威將軍朱禮皆葬于

蜀山里疑即此

金蔡祖廟 縣西三十五里宋余襄公廟記存焉

覆釜巖廟 縣西六十里神姓蕭氏號蕭王相傳五代時嘯聚戰敗逃此環廟左右屋基鱗次俗謂其南曰寨門乃古寨有

古鐵索香爐箭鏃數種

銅巖廟 縣西南三十里銅巖之陽鄉民歲設白佛齋於巖下以祈秋成相傳昔年大旱有一木像

目蘭谿遡流而上服白衣狀若仙人時異之昇至佛刹禱之即雨今郡境寺觀皆禮之以白衣故名白佛

僊山廟 縣西南四十五里葛仙翁修真之所水旱禱之有應

神相祠 在山蟠谷嶺知縣鄭錫文為朱煜建

真武大帝殿 永平寺殿前右康熙十年知縣辛國隆建

關帝殿 永平寺殿前右康熙十年知縣辛國隆建

附廢 金鵝祠 金鵝塘側

忠義祠 祀童子明西門外胡公廟夷萬曆戊申知縣朱顯文建孫應寧出基子明董宅碎存

專祀

永慕廟

祀秦孝子顏烏在縣東四里孝子墓左宋端平二年

右丞相喬行簡奏賜今額淳祐元年兵部郎官康植

肇立神位景定三年縣令李補始作廟每歲清明日

縣令率僚屬祭享顏其額於廟門李補記邑東之三

墓秦顏孝子氏事親孝葬親躬畚耜羣烏銜土助之

喙為傷後旌其邑曰烏傷曰烏孝曰義烏皆以孝子

故垂二千載景定庚申補來試邑拜墓下徘徊楸陰

父老前曰初二阡坐荆棘辱樵牧墳而不廟端平間

邑士請於朝得旨賜今額續兵部康侯植封其兆墉

其周屋於旁數楹僅署香火補聞而盡然相舊制梁

桷赤白墜剝不治果不足以揭虔妥靈迺屬簿曹陳

君寧祖董是役與里之善士樓君思問黃君縝周君

寓黃君璧卜改作證圖牒復民所侵地於墓之東面

野背山得址焉庀工度材並手偕興殿堂門廡咸以

度經始於辛酉之正月而以明年二月成嗟夫役晨

昏犯寒暑荆穢剝朽前指後畫以續於成者諸君力

也人知黜聖丹漆之壯麗而不知財之所輸見徒之

合散而未見奔走之及已顧不偉與會補赴浙右帥

幕行有日揭嘉號於廟門里人來觀動心駭目咸謂

今天子孝治天下之心賁及草木燧乎有光矣迺諗

于予曰秦以法律愚天下隻鉏寸帚盼焉德色諄

語視孝為何物顏氏獨不愚於秦如此夫且驪山下

錮三泉水銀鵝鴛鴦封隨圮而烏喙泥粒迄今巍然

烏邪天邪孝子不求助於烏而烏自動其感非烏也

天也天借烏以媿不顏者耳吁人心之天萬古一日

雖不以廟而存亡然不廟則非所以宣上德永人心

之慕也言訖觀者請記之補遂述始末囑黃縝子應

蘇書以立石宋太史濂贊古有醇孝厥姓惟顏父

喪未葬行泣道間我畚我鍤是藟是瘞彼羣烏何知

銜土予助我豕旣封烏吻血流感爾異類愧我同儔

秦風日漓借耰鋤而德色誰意露雲之四蒙見此皦

日于載之下禮憲淪胥豈獨愧君烏亦不如有廟嚴

嚴春秋是祀用典
薄夫作我孝子
明洪武間屢修屢廢永樂十五年

知縣李玉正統五年縣丞劉傑俱重建復毀萬曆元

年知縣梅淳卽故址重建堂三間寢室三間門一間

四周爲垣堂以享公以宋孝子樓公蘊明孝子龔公

曇配享春秋二祭又設顏公父神位於寢室祭之日

并奠梅淳記余自縉雲移令義烏卽聞縣之得名以顏公感烏公秦人父喪負土葬之烏銜泥吻傷

故秦名縣烏傷繼改今名嗚呼異哉顏之爲孝也感

於烏靈且怪矣烏獨靈於顏哉卽下車訪父老詣烏

傷墳見土封高聳越千載如一日去公墳僅五步宋

景定二年縣令李公補建公永慕廟去公墳南十五

步草棘荒蔓已成丘墟視之令人悲且惕焉予時令

封其土卽欲構其祠而始政紛劇上下經理未遑迄

今期歲矣卽不敢謂政通民和然是務邑所自始也

風民者所有事也顧名思義予烏可已哉於是基地

方正鳩工集材爰舉厥事邑人爭助力構之爲寢室

四楹亭堂四楹門房半之繚以周垣成祭之妥神在

堂設豆在几一時褒崇之典煥然新矣然享公而公

之父不及享公之心安乎哉推公之心禮以義起特

設公父神位於寢室祭之日并祭奠焉嗚呼若是可

以風民乎哉邇邑先哲感顏之風而興起者若宋孝

子樓公蘊負土築冢行者墮淚我朝孝子龔公曇廬

墓悲號三年一日皆心顏之心者也謂不能感顏之

烏不可也近則民心愈離樂兵戈而去之他鄉者紛

如生無以爲養死無以爲葬祭視之反哺之鳥亦有

愧矣矧能感顏之鳥哉顏亦人子也烏亦孝鳥也能

以顏之子事顏之父則顏之鳥見於今之世子不如

顏烏亦不如顏矣烏獨靈於顏哉余蒞茲土愧無以

爲民之風也築公之祠崇其墓及其父并耐食其繼

公者豈直慕公之風已哉思以公之風風邑人初正統中知縣劉同縣丞劉

傑置祭田二十畝命接待寺僧歲種以供祭祀年久
莫稽萬曆二十四年知縣周士英清出仍命寺僧管
理裁定祭品每祭用豕一羊一牲醢果食各五計該
銀二兩查縣每次原有祭銀一兩二錢五分議派作
豬價香燭及調和等項其羊隻并五牲五果五食取
足寺租銀七錢五分四釐祭期擇仲丁日專祭儀注
具如後忠賢祠

祝文 孝為百行之原而先生能盡之烏為一物之
微而先生能格之生百世之上百世之下聞者莫不

興起非先生之純孝烏能感物如是邪以宋孝子樓

公明孝子龔公配尚饗其田地山號詳列於後

- 一孝子墓基五畝五分 一荒地二畝
- 一中地二畝三分 一碑塘頭高田一畝九分六釐
- 一碑塘頭高田二畝三分
- 一廟前高田三畝五分
- 一廟邊平田一畝五分一釐 一碑塘頭寺田三畝九分六釐
- 又高田一畝二分 一墓邊平田一畝五分九釐
- 又田一畝九分九釐
- 一山邊高田一畝二分五釐
- 一墓邊田一畝八分七釐
- 一碑塘邊青山七畝三分六釐
- 又地九畝八分

劉同題孝子祠詩二首親殞貧無力號天欲斷腸築
墳憐汝苦銜土歎烏傷老樹風霜古穹碑歲月長邑

名因孝行千載共流芳 滄桑幾更變孤冢獨巍然
邑號慈烏義人推孝子賢鶯聲雲外樹草色雨餘烟
此日瞻遺像青蘋薦碧泉 按駱侍御賓王亦有祠
明萬曆中學使蘇濬移文祠於鄉作忠孝辨一卷

宗忠簡公祠

祀宋門下侍郎御營副使宗公澤初在滿心寺內元

皆建明正統八年知縣劉同重建 邑人黃潛記義烏

臣忠簡宗公之文也石毀弗存已久寺僧日直日謚
實公七世諸孫直先示寂謚今以甲乙之傳嗣為住
持爰輟其衣孟之資購田若干畝祠公于西廡探家
集得舊記重刻諸石而俾某志於下方謹按公諱澤
字汝霖世為義烏人元祐六年中進士第調館陶尉
歷龍游膠水趙城令政和三年改官知萊州掖縣差
通判登州忤道士得幸用事者既丐祠而歸猶坐削
奪羈置鎮江因卜居焉經郊恩敘復監鎮江酒務靖

康元年以臺臣薦召對假宗正少卿充和議使公奏
名不正更其名計議使訖不行會選易河北帥守乃
擢公直秘閣知磁州河北義兵都總管就遷秘閣修
撰高宗以親王奉使過磁公力止之朝廷即授以兵
馬大元帥公為副元帥暨高宗正位宸極命公以龍
圖閣學士知襄陽府俄徙知青州又徙知開封府遂
以延康殿學士為京城留守兼開封府尹陞資政殿
學士方身任中原之事時宰忌公者從中阻之公以
憂憤成疾而薨建炎二年也有旨拜公門下侍郎御
營副使而遽以遺表聞詔贈觀文殿學士尋賜諡忠
簡公階正郎卹典初行止用侍從恩數進四官後乃
以通議大夫告其第累加至開府儀同三司云公墓
在鎮江之京峴山而立廟於鄉郡從祀於邑庠並著
於有司之彙典謚之生上距公沒二百餘歲且去家
為浮屠而不忘乎賢其親其親祠事之與又禮之
以義起者也某是用序次其作始之自并以公官代
之槩系焉公平生大節及功施於社稷者有傳在國
史有遺事行於世茲不書 吳芾詩嗚呼哀哉元帥

公百世一人不易逢堂堂天下想風采心如鐵石氣
如虹正色立朝不顧死半生長在謫籍中真金百煉
愈不變流水萬折歸必東落落奇才世莫識欲知勁
草須疾風維時中原丁禍亂邊塵漲天天濛濛衆人
畏縮公獨奮毅然來建中興功雄圖一定百廢舉獨
見南陽起臥龍嗚呼哀哉元帥公翩然遺世何恩恩
無乃上天亦乏材故促我公還帝宮公還帝宮應有
用何忍坐視四海窮嗚呼四海正困窮與什植僵賴
有公公昔居東都天下日望公登庸公今既云亡天
下不知何時康正如濟巨川中流失舟航當今士夫
豈無人請問誰有公器業誰如公忠良公雖不爲相
德望振要荒公雖非世將威稜讐豺狼偉哉奇節冠
今古我試一二聊鋪張靖康明年秋外敵正披猖廟
堂驚失色愁睹赤白囊公首慨然乞奉使欲以口伐
定擾攘朝廷是時未知公公之素志不獲償憂國耿
耿思自效再得守土河之旁命下得磁州翼日徑束
裝下車未三日敵騎已及疆敵人聞公亟退舍疋馬
不敢臨城隍項之得兵數十萬康邸賴公王業昌及

公領留守北顧寬吾皇恩威兩得所春雨今秋霜餘
刃曾不勞微弱成安強姦雄盡膽落誰敢亂紀綱嗚
呼哀哉公死矣民今有粟安得嘗薤藹乘我虛近復
陷洛陽洛陽去東都雉堞遙相望不聞敢侵犯豈是
軍無糧祇畏我公霹靂手氣懾不復思南翔嗚呼哀
哉公已矣秋高馬肥誰與防天子久東狩去冬幸維
揚都人心戀主謂言何相忘朝夕望回輦斷腸還斷
腸公獨以死請百請意愈剛嗚呼哀哉公死矣萬乘
何時歸大梁咄咄肉食人尙踵蔡與王姦諛蔽人主
痛毒流萬邦人怨天且怒意氣猶洋洋所冀我公當
軸日盡使我曹膏劍鏃嗚呼哀哉公死矣始知國疾
在膏肓我公我公經濟才設施曾未究所長但留英
聲與茂實永與日月爭輝光此死於公亦何恨顧我
但爲天地傷我聞天下哭公者哀痛何啻父母喪父
母生我而已耳安能保我身無殃都人此時失所依
波逆東下紛蒼黃我公我公不及見秋風在處生悲
涼百身倘可贖我願先以微軀當靈丹如可活我願
萬金求其方死皇竟無起公計安得長喙號穹蒼嗚

呼哀哉元帥公太平時節君不容及至亂離君始用
 民之無祿天不從嗚呼哀哉元帥公古來有生皆有
 終維公存亡係休戚千年萬口長怨恫嗟我草萊一
 賤士念此抑鬱氣拂胸銜哀忍涕何有極願以此詩
 銘鼎
 正德十三年徙寺為學宮祠廢
 慶五年御史

謝廷傑檄有司各舉先哲之祠知縣歐陽柏奉府議

卽二都舊祠加麗以祀公
邑人朱湘記宋宗忠簡公澤故有祠在滿心寺內我

明正統八年重建正德間徙寺為學宮祠亦隨廢廟
 貌丘墟迨今五十餘年矣隆慶辛未閩惠安鄭公來
 守我邦政通民和百廢次舉亟圖所以表忠賢而崇
 教化會江西新建謝公以名御史來按兩浙振揚敷
 歷敦尚節義檄有司各舉先哲之祠悉新之太守下
 其檄於所屬邑惟時楚潛江歐陽君柏宰吾邑奉檄
 往視公祠無復遺礫顧謂父老曰祠凡幾建而今為
 墟矣卽新之其誰與守且公已竝祀四賢祠內是祠

或可以已否也有復於歐君者曰公之裔有居二都
 宗堂者去郭不五里許家有專祠適臨孔道盍就其
 祠增其所未備俾其子孫世守之不亦可乎歐君是
 其議上之太守以呈謝公胥允焉而以縣丞蕭萬夫
 董其事繼而歐君以內名去郡節推宿松劉君守恒
 視邑篆督察惟嚴百工畢力不踰時役以告竣而又
 為碑其故址使無或侵軼祠為正寢三楹廳三楹門
 五楹仍宗氏舊也益以東西廊房十一楹繚以周垣
 飾以俎豆像而祝之煥然稱厥祀矣太守謂余邑人
 屬之記余惟宋運旣衰敵馬南下所在風靡文武冠
 蓋之士惟同聲和議以求苟安旦夕已爾公獨力抗
 強敵矢心恢復瀝誠以誓將士單騎以招劇寇於時
 王善楊進之徒皆以數十萬眾聽公指揮兩河忠義
 之士京東西諸路民兵四面雲集咸願聽公節制兵
 勢旣振所向克捷然後力請回鑾以繫屬人望疏凡
 二十四上悉為汪黃輩所阻公不勝憤竟以疽發背
 死臨卒猶呼過河者三嗚呼公之心不以成敗利鈍
 異不以生死二其君不能用而公不恤舉朝大臣以

為狂而公不顧若公所謂社稷之臣非邪昔諸葛孔明當漢室既頽羣雄僭竊與其主東馳西騫以建三分之業後世稱難焉然亦幸有昭烈為之君也宋雖中替人心未改使公遇孔明之君操孔明之權其事半而功必倍之矣奈之何高宗之闇甚也然則公之不能成功天也非人也乃宋之不幸非公之不幸也嗟夫公不能存宋之宗廟社稷於中原至死猶有遺淚身後之祠其廢其興公亦何心哉顧竭忠殉國者人臣之道也旌賢勵俗者觀風之事守土之責也公之忠誠偉績可以法天下傳後世矧於其鄉乎祀公於鄉使其鄉之人知公之烈百世不磨後有作者期無愧於公可矣此謝公與太守修祠意也國初吾邑若王忠文公禕靖難之時若樓公瓊龔公泰皆抱忠不屈視死如歸英風特節響應後先此雖山川間值謂非聞公之風而興起不可也然則是舉也其有關於綱嘗世教豈淺哉公生於石坂塘遷居廿三里登元祐進士所遺有言行錄文集各若干卷茲又史氏所畧余故為并著之以詔來者謝公名廷傑鄭公名

一信而同知河源李君燾通判豐城袁君均咸皆先後贊議法得並書是為記 金谿吳伯宗像贊公之力足以旋乾而轉坤公之功足以攘裔而安夏始以一言能返北旆而南還後以二十四疏不能回南轅而北駕且留鑰之任方切而巧言遽入於帝聰渡河之志未酬而大星已殞于中夜何人之於公則知媚嫉而天之於公則不知假借此有志之士百世之下所以想英風而激昂拜遺像而悲咤也

徐文清公祠

祀宋待制徐公僑在縣南四十五里清德里久毀宣德初嗣孫徐季德率族人創祠靜安里橋西以祀

黃細高居士祠

祀宋黃公中輔在縣東金山頂事詳傳

龔右史祠

祀宋龔氏應之在松門

龔氏出自晉大夫堅至陳大建中諱孟舒者拜河南觀察

使二十一世孫寔始遷烏生六子世宏世隆世廣世恩世昌世英伯仲友善俱從事東萊學為世名儒鄉先達諭工部良能目為六瑞楊忱中作六瑞堂記孫明之應之愷皆仕顯自明之至永吉凡七世○舊志載遺事今附此

朱左司祠

祀宋朱氏元龍在東朱事詳傳

劉武節侯祠

祀宋劉公仕龍在青巖銀樹園有漢太孫亭事見選

舉表及遺事劉豪墓下今補傳

葉通齋先生祠

祀宋葉氏由庚在縣西北槐花門事詳傳 有真儒坊

黃文獻公祠

祀元學士黃公潛在縣西六十步至正二十二年知

縣胡惟信建明正統六年知縣劉同重建

門人王禕祠堂記古

者君子出而任公卿之位及其退處於鄉也人稱之曰鄉先生歿則相與立祠於社尸而祝之崇德美敦化原也嗚呼若吾先師文獻黃公所謂古之鄉先生者歟公諱潛字晉卿世為義烏人登延祐乙卯進士第歷官州縣所至以廉能稱入為應奉翰林文字遷國子博士居六年所教弟子悉為名人除江浙等處

儒學提舉年未七十卽納祿歸養遂以中順大夫秘書少監致仕家食久之於是儒林宗工日就凋謝國
家思用老成致仕以翰林直學士起公於家尋陞侍
講學士兼知經筵復總裁國史其居經筵每進講必
陳仁義道德之說在史館筆削無所阿凡朝廷大詔
令大制作皆以屬於公而公獨任斯文之重爲海內
所宗師矣未幾控辭而歸里居又數年至正丁酉年
八十一而薨制贈中奉大夫江西等處行中書省參
知政事護軍江夏郡公諡文獻儒臣之榮斯爲盛焉
今行中書省臣建議謂公以精純之學羽翼聖學以
典雅之文黼黻人文誠一代之儒宗百世之師表義
烏乃其鄉邑建祠致祭於禮爲宜下其事有司先是
縣令胡侯旣哀公文集鏤梓以傳復因門人里生之
請方掄材度址圖作祠事而省牘適下卽慨然以爲
已任擇吉壤繡湖之東爲祠宇三楹間而肖像其內
肅賓之軒守祠之舍列於左右其外繚以崇墉樹以
名木祠事之所宜有者靡或不具歲癸卯正月甲辰
落成之年月日也雖宰臣分藩鎮撫東土德威竝著

列城奠安然敬故尊賢尤爲先務是祠之建允合古
誼而縣大夫保有民社政績昭彰又能知爲治之要
汲汲焉祠事之是成其於教道誠爲有補是宜勒辭
麗牲之石以紀其端原若公之學術志行揆諸聖賢
而無媿者其詳所在有行狀有家乘墓隧有碑銘太
常有諡議國史有列傳茲不復書銘曰山英川靈孕
氣淑清鍾爲名賢維公有作顯顯文學聞譽昭宣其
學之長內聖外王喬嶽澄淵其文之精玉振金聲入
神出天用以名世邦家之瑞絕後光前國有老成是
曰典刑當寧載延文儒所職金匱石室廣廈細氈控
辭歸休優游林丘德義彌尊卹典孔崇于飾其終光
賁重泉廼作祠宇碩碩其礎繡湖之埂公像在堂歲
時烝嘗率禮弗愆道爲世師人懷教思有弗謁虔勒
辭焯德垂示無斃牲石是鑄 門人宋濂記星辰之
昭乎上者天之文河嶽之列於下者地之文經緯乎
兩間而不昭至道者人之文人之文雖若有不同或
得之者亦足以配二儀而嘗存後萬物而不凋蓋以
長庚之精峨嶠之神皆降而爲命世之儒所以能軋

摩日月扶植鴻化以震盪乎一世故雖其魄已喪其神不亡乘一氣於太虛間鼓舞變化隨雨露風霆而著形焉尸而祝之實有不得不然者矣有若烏傷黃文獻公其殆庶幾乎公之方姪母夫人夢大星煜煜然墜于懷及其生也繡川之水為之一清是蓋星靈川祥所融凝而成者故公遂以文章鳴一時侍講經筵闡明聖學掌宣皇制黼黻太平昭回雲漢之章衣被乎草木人文化成之效於斯為盛是則公雖薨而其耿耿不沒者固已游神太清在帝左右而祠之不以私行之既久政通人和屢謁公之墓下涼颼動木悵然而有遐思卽下令禁其樵采復輯公之遺文刻梓傳世侯猶謂未足以交神明乃請於上官築祠於繡川之濱堂庭穆如門廡清謐像設有嚴丹雘焜燿落成之日侯具牲酒盛服致祭公之孫子邦之羣彥咸從侯後精神格乎契乎沖漠焄蒿悽愴如將見之祭畢而燕籩豆靜嘉穀核維旅鴻休誕昭秩秩雍雍四方之士來游來瞻僉以為侯之為政知所風厲而

公之靈爽永有攸棲矣或者則曰人死則其氣漸盡古者祭鄉先生於社不過崇德報功為人勸爾子曰其神不亡無乃涉於誕邪嗚呼是未知鬼神之情狀者也世之彊夫志士用物精多尚能著靈響廟食百世况鍾天地靈長之氣而發為文章之英者乎其不隨世而磨滅者決矣至若庸夫凡氓其德不顯其鬼不靈則當如此言爾初祠之成同門友王君禕既為紀其歲月公之子梓從子樞從弟英暨甥劉某陳某謂侯是舉有關於名教之重而非私於一家又請濂詳文其事於石以昭侯之善與此祠相為終始按春秋書事之法辭有重複而不殺者因竊取義而為之記復繫之以詩曰大星煜煜流光晶川原斂滓若鏡澄發為五色文章英上騎日月薄太清呼吸雨露鞭風霆在帝左右持文衡交龍降升藻火明生色燦爛丹鳳翎萬物承被流華榮一氣闔闢不可名玄功斂迹歸杳冥其魄雖離神則形炯炯直與造化并有祠翼然安幽靈陽烏高騫聳孤稜庭宇沕穆森巨楹歲時奠酒輸精誠牲牲肥腍酒潔馨倏陽忽陰誰使合

有神來下風泠泠若乘玄麟紫霞輶降爾百福
響然憑鄒魯禮樂當游興春秋報事垂千齡

王忠文公祠

祀明待制王公禕在縣南十里齊山下

翰林修撰吳寬記唐昌黎

韓氏以文章妙天下歷千百年鮮有及之者豈其下
筆刻落陳言卓然成家足以聳動乎人哉其氣充其
理直其言遠而暢也固宜方鎮州之亂王庭湊圍牛
元翼於深州穆宗詔愈宣慰其軍且戒愈度事可否
無必入愈奮日安有受君命而滯留自顧者遂疾驅
入之時庭湊操刃逆愈甲士林立愈以寡弱之質直
嬰其鋒顧乃厲聲開說將士聞之震掉失措氣阻而
語塞卒之不勞一旅不失一鏃庭湊而出元翼愈
之功也故嘗竊論韓氏之文之妙由其所養者充所
守者直而其名至於今稱之者非徒以其文而已也
皇明初興以文章用於時者多癸產若學士宋公景
濂待制王公子充尤稱傑然者二公之在館閣日惟

以文章爲事人以文士目之久矣一旦王公奉使西
南裔而仗節以死然後知公之學有用也蓋高皇帝
以神武取天下號爲無敵獨雲南恃其險遠未下乃
洪武五年以王公使其地諭之僉謂公文士不宜蹈
不測之裔類公受詔不顧既至見其主梁王其臣達
理麻諭之再三初皆有降意已而猶豫留公不遣公
亦持節必俟降之乃返會元之遺孽有使至雲南聞
納我使讓梁王王出公俾自當之公引天命國勢爲
辭其言甚壯且曰我遠使來誓爲國死終不能爲若
屈元使怒梁王恐遂死後八年大兵竟平其地而郡
縣之又後爲正統六年朝廷始贈公學士諡忠文以
報其死節嗚呼公之爲文學乎韓者也其爲使亦同
乎韓者也而其事之成否身之存亡則有幸不幸之
分焉然公不可謂不幸者故姑卽竝時宋公較之二
公以文章見用其名實相伯仲宋公之位差顯然身
見其子若孫皆死於法旣老不能免川蜀之行而其
故居在金華者莽焉荆棘過者憐之若公則沒於王
事其氣節偉然且官有贈行有諡而其子孫皆賢而

有文能守其田廬又有為廟於家以禮祀公如曾孫
日進士汶者此其所以為公幸也王民初居義烏邑
中後南遷十里日青巖山則自公始公之子國子博
士紳嘗與其兄綬謀作家廟不果僅即堂之夾室以
展祀事國博之子處士稔仍其舊室既卑隘歲久將
歷浹始克為之乃擇正寢之東為屋三間中奉公為
百世不遷之祖子孫列祔右男左女秩如也垣門階
庭高固整廣不隘不侈于禮為宜工始于成化十一
年八月己丑明年十一月戊辰訖工復割田倡其族
人以供粢盛廼以書告其友吳寬曰家廟之制未稱
吾尊祖之意若庖湍齋戒燕飲之所皆所宜為而未
為者吾一人之力不足也雖然吾志有在終當為之
幸子為文刻之廟中以識吾志寬感汶之好禮不復
辭輒為書之是廟也凡以奉王氏先世而獨詳於忠
文公者蓋公王氏百世不遷之祖也為百世不遷之
祖則享百世不遷之祀夫世至於百遠矣後人能如
汶之賢則可不然有能知其故而思所以尊
祖者乎固宜詳書以告之耳亦汶之意也

金青村先生祠

即劉青村先生

祀明金公涓在縣西崇儒坊巷內傳縣舊簿廳事詳
傳

龔忠愍公祠

祀明都給事中龔公泰在城南河濱成化十二年子

侍郎永吉建寢室六楹兩廡中門

淳安商輅記皇明
有忠臣曰龔君浙

之金華義烏人投城死節其子永吉歷官禮兵二部
侍郎尋轉南京大理寺卿追惟厥考與孝孺方公同
節悵然遐思成化丙辰春爰命冢子潼掄材度址建
祠於南壕之濱構寢六楹夾以兩廡樹以中門儲以
祭庫繚以崇墉割田四十畝以供祀事落成之日永
吉屬予勒辭廟石以昭來裔輅忝同朝雖不文奚容

辭君姓龔氏諱泰字叔安先漢渤海太守遂之後簪
笏傳芳為烏望族至宋有宣教郎諱明之者君六世
祖也君九歲而孤母節婦傅氏太孺人遣從宋濂門
人宗思睿游洪武丙子舉鄉進士歷任戶科都給事
中壬午六月靖難師渡江有旨令公巡城公與其配
傅訣曰顧國事至此不可為矣吾分必死爾第齋救
攜幼以歸急則俱溺於井母自辱也須臾火起內庭
公馳赴之道遇兵校執送金川門驗非奸籍中人釋
之公遂自投城下而死是月十三日也厥後賜諡忠
愍因扁其祠曰忠愍公祠俾今此縉紳目擊心維子
姓賢裔顧名思奮庶有俾風化有係綱常視庸流廟
宇丹楹刻楠僅飭偉觀而無關世教者不啻霄壤公
之死也人咸悲之而紀其忠為墓碣有若大學士金
幼孜為墓表有若靖遠伯王驥為像贊有若尚書胡
濙他若太嘗之諡國史之載列傳之記揚厲尤悉而
輅廟石之鐫特梗槩耳銘日光岳氣鍾誕生名公投
城死節竝駕龍逢光射日月節凜霜風猗歟臣鵠卓
哉孤忠流芳竹帛勒諡鼎鐘君殆無憾賢胤繼踵爰

崇祠宇歲時祀公廟食梓里卹典斯隆琢銘貞石垂
耀無窮 按舊志作丙辰誤 于永吉主兵部事嘗
宣宗寫秋水圖賜詞萬頃烟波渺渺數行旅鴈飛飛
沙嘴黃蘆歸棹渡頭紅葉斜暉楊士奇跋舊遺事

崇德報功祠

祀明兵部侍郎龔公永吉在縣南置馬塘山之原成

化八年勅建

王慎記成化辛卯七月廿有五日致政
龔公永吉卒郡守李嗣謂功臣之亡不

可泯滅命公之冢子潼具奏以聞越明年春三月朝
廷遣行人田勝營其墓於太邑置馬塘山之陽建其
祠於本山之原李承命復綱維其事祠墓之制寬若
千丈甃以石繚以墉壯觀以石獸中有堂左右有廂
碑有亭神道有門華表有柱如命也將以是年秋九
月告成而歸寔焉潼以余與公有同朝之雅不遠千
里具述其故而謁予記之余惟國之待臣始終一致
德在所崇功在所報者生則寵錫之死則葬祭之非

以示聖恩之浩蕩且爲天下後世臣子勸也公金華
烏傷人在宋元若何文定王文憲金文安許文懿數
君子出而宗主天下道學享我朝之廟祀者皆邦人
公生數君子之鄉起數君子之後慨然有志於數君
子之學發軔巍科官歷武選公以韜畧雄才聖明倚
重五征外落兩伐蠻苗邊功兵績不啻龜卜燭照拜
侍郎累官至大理卿立朝四十餘載義膽忠肝照耀
日月後公以引年乞歸公生旣膺寵錫而兩都久居
大位於死而祭祭而葬公非過也崇德報功之盛典
也朝非私也爲天下後世臣子勸也吾知是墓之成
庸夫愚婦亦將曰公之德何如其大公之功何如其
多朝廷之崇報何如其盛隆名偉望與宋元數君子
竝駕而同稱與天地悠久而弗磨
矣郡守李嗣請勒諸千秋之石

合祀

忠賢 宋宗忠簡公澤

徐文清公僑

元黃文獻公潛

明王忠文公禕

龔忠愍公泰在縣治後舊祀宗徐黃王四公名

四賢祠嘉靖二十二年知縣梅凌雲建萬曆元年命

採革除死難諸臣建褒忠祠以祀兩浙凡十二人龔

忠愍公泰與焉知縣梅淳擬建公專祠不果乃申請

合祀四賢祠內易其扁曰忠賢

梅淳記自古忠賢之
同一道也以忠足以

扶天嘗植臣紀而賢足以敦正學淑人心故國家褒
之間里榮之祀典恆奕奕乎有祠焉國初靖難死節

之臣近百餘人雖或雜記於野史哀談而無以聞之
朝廷名氏寥寥不見表章二百餘年矣迨今聖上嗣
登寶位崇重化原始命下各有司采實革除間死難
臣以聞時巡浙御史蕭公詢訪浙中得青田劉公璟
海寧方公孝孺義烏龔公泰等凡十二人上請旨允
建褒忠祠於武林春秋合祀以風勵人心聖天子之
意蓋以既食其祿則當死其事此其諸臣烏可泯滅
其忠而國家不獎忠寬於既往則何以勸臣節於將
來亶平其慮遠而義大也予忝令義烏於忠愍公宜
建專祠以祀而必合祀於四賢者何邇邑之先若宗
忠簡之憂憤徐文清之剛毅黃文獻之學術王忠文
之貞烈彰彰較著人皆仰之今考忠愍自少苦志力
學屏絕紛華從宋潛溪先生門人宗思睿游源流正
矣仕洪武間奉旨往青州閱齊王府兵伍又嘗監視
安東護衛軍儲廉慎勤敏人用畏服功業偉矣事建
文爲都給事中敷陳治道議論剴切靖難師渡江知
國事不可爲遂與其妻訣自投城下以死節義著矣
嗚呼四賢往矣微龔公孰與繼美哉夫大德侔者不

拘時異本心合者不論事殊五公雖生有先後事有
嘗變身有死生首領或全或不全然賢者必忠忠者
必賢同歸於道而已以之合祀誰曰不可故余建議
請於蕭公蕭公是之甲戌仲秋率僚屬師生奉公神
主入祠具禮以祭易書其扁爲忠賢合而言之道也
署學事鄉進士黃公謂余曰是舉也死君父者祀於
鄉禮之特典也仍舊祠民得不費政之善物也表忠
賢後先輝映邑之雅觀也有三善矣公其得無識乎
余曰此聖天子之命也侍御公之意也邑士人之光
也予特奉而行之何功之有四賢事已勒諸貞珉故
余獨詳於忠愍紀其事於石庶來世知所考焉若夫
忠賢之道具於人心後必有感發而興起者是在諸
士子之自勵耳庸書以俟二十四年知縣周士英以祭銀嚮未設
有成額往往移借猪羊應用於禮爲褻乃牒學會議
將歲派祭銀內另裁出銀六兩以供二祭每祭用帛

六豕一羊一牲醢果食各五祭期擇仲丁日專祭先
 期省牲送物料令禮生陳設俱用瓦器如式製造次
 蚤各官吉服行禮祭畢頒胙
 祝文 魏乎諸公萬代尊崇稠山毓秀洙水承踪文
 章華國道德開蒙精忠報主偉烈驅蒙江河行地日
 月麗空某等職司化導心切師宗肇稱義典令祀一
 空蘋蘩殷薦式樹民風尚饗

追祀

吳泰伯行祠

在大玄封都察院都御史嗣孫吳瓊率族建

吳季子行祠

在江灣之原宋進士吳大年奏立子郡馬璞之子錄

建 按璞娶咸寧郡王女
長興郡主故曰郡馬

沈記室祠

祀梁沈公約名沈約祠後改沈氏一本祠在雙溪
明給

事中朱肇記

樓侍郎祠

祀梁樓公偃在夏堰

孝馮祠

祀唐孝子馮子華在縣南三十五里赤岸江山永馮

度建

郡人章拯記

王公祠

祀宋邠國公王彥超在曲江濱

王丞相祠

祀宋丞相王公旦縣南三十五里環溪田心裔孫進

士鈇有建

王進士祠

祀宋王固在蒲潭上明洪武間王茂傑建

古志載文學固字天

既受業安定胡先生之門東都盛時縣人第進士自固始固初名同臚唱之日仁宗賜以今名卒官恩陽令右正言知制誥李清臣銘其墓從孫永年繼登進士第累遷中大夫知福州封文安縣開國男食邑三百戶贈正議大夫永年子鑄通判嘉興府累贈金紫光祿大夫孫寧提舉廣東常平茶鹽寅歷知宐運藤柳峽饒江七州曾孫謙知隆州舊志刪註選舉數語黃潛跋王江州誥右王江州誥詞中書舍人樓鑰行宋三百年吾鳥傷第進士者實始於王氏皇祐癸巳則恩陽令固紹聖甲戌則知福州贈正議大夫永年福州之孫寅乃弗取世科而用蔭入官歷守七郡其以朝請大夫知江州則慶元年正月也凡州郡守臣差則出勅除則給誥而誥必有褒祠故尤以為榮江州之七世從孫禕從子游京師子因閱官書於史局得此誥詞錄而歸之以備其家乘之闕文

樓宣獻公祠

祀宋樓公瑤在縣後東門裔孫樓應聰重建

王進士祠

祀宋王槐在縣南三十里蜀墅塘舊志不載從裔孫補入

朱太守祠

祀宋吉州太守朱公宗儒在泮塘刑部員外郎朱湘

父鴻率族眾重建郡人太常卿唐汝楫記

丁博士祠

祀太常博士丁公霖在盤石稽亭岐路元裔孫丁存

金建王汶記

陳駕部追遠祠刻於龍舟橋畔昔朱文敏重葺

祀宋駕部郎中陳氏黼東陽人呂祖謙弟子葉邦門

人在倍磊明嘉靖間總制胡宗憲以其族勦礦寇有

功給銀修建

陳太守祠

祀宋合浦太守陳修在霧溪宋京諭玘建紹祖重修

陳進士祠

祀宋陳林在繡湖濱朱湘記

義烏縣志

卷之五

祠祀

三

毛進士祠

祀宋毛炳在南門外

王進士祠

祀宋王邁在縣南三十里後塘

王狀元祠

祀宋王龍澤在青口

朱學正祠

祀宋朱徵在候珠街濱裔孫都督朱文達重建

金進士祠

祀宋金昌年舊在縣東金山頂遷七都龍華

陶進士祠

祀宋陶瓊在縣北二十里西陶

選舉無考

朱氏時思祠

祀元隱士朱權

譜稱朱子仲子苙生鉅鉅生淵淵生權權由東浦徙縣山盤

在山

盤上城塘明洪武中權曾孫孝子叔誠建成化四年

三宅改祠洲岸

方編修祠

祀明方叔衡在縣西北二十里川塘

李大理宗祠

祀明大理寺寺丞李鶴鳴在湖清門側醴陵知縣李敬孫率族人建

吳教諭祠

祀吳主一在江灣

胡氏追遠祠

祀宋處士胡垣明布政胡讓太守胡禧在縣東北三十里酥溪

二朱祠

祀晉臨海太守朱汎金威將軍朱禮在縣南清德里

楊氏追遠祠

祀先世登仕籍者在縣南四十里赤岸楊氏子孫建

後唐回圖使諱虎唐宰相綰五世孫也奉身簡寡傳家清白世居縣南之赤岸子孫登科第者十有八人故楊焯錄詩清白堂有身透龍門十八人之句今縣庠題名記止有十三人曰定智及晏昴潛誠之忱中貫焯夢高樵點炳至於澄登至和榜沔登宣和榜端登賈黥榜與及登蔡蕤榜永言登劉章榜皆畧而不錄蓋宋題名記跡自元祐而下缺畧八十年故也十八人之外有特奏進士仲堪且一夔茂先免解進士起巖文及信及寅漕貢進士應霆杰琛待聘天佑等咸克紹先烈傳日德厚者流光回圖使有焉續錄之俾後之傳家者知所勵云○舊志載遺事改附此

梅隴祠

在隴頭給事中朱肇建

尚書胡濙記 朱良祐字元德積善好修孫祀生九子長

大任漕貢進士次夢魁咸淳戊辰進士次應魁太學內舍正奏名次榮翁浙漕進士次淳咸淳庚午進士次叔麒亦戊辰進士次天與廣德判官其二子嘉猷壽孫並業儒因有九子七登科之頌祀贈婺州路判官世居赤岸以衣朱映水赤光照岸名○舊志載遺事改附此

虞氏追遠祠

花溪久建嘉靖間嗣孫刑部侍郎虞守愚倡立

新之

思祀

潘公遺愛祠

祀邑侯潘公允哲上海人在儒學左名宦祠前縣民

黃大才陳夏朱濟金香等建侍郎虞公守愚助一都

三保日字四百五十九號田二畝計租三十

員外郎朱

湘記邑侯蘅渚潘公多惠政民甚德之踰年以行取去百姓思公將立廟以祀乃相率請於分守虛江張公得繡湖之北隙地一區依巒官而址焉一切木植工役經費皆百姓爭獻助不毫髮藉於官而斂於衆越月祠既成鄉耆黃大才等編言以記其事且曰使吾黨子孫世世無忘公德而記焉葺焉永無斁也嗟乎善政之得民固如此哉史臣之贊曰政良張急理善烹鮮又曰一夫不獲謂之愆古之於民也良吏之盛者無如潘公漢考諸史冊西漢所載維文翁

朱邑等六七人東漢所載維任延錫光等十餘人至稱其所以治不過曰謹身帥先居以廉平不至於嚴而民化曰所居民富所去民思而已當其時在朝廷則有賜金進爵之賞在百姓則有立廟樹碑之報故桐鄉之祠桂陽之祠安陽亭西之祠後先相望至今照耀後世獵進之心勝操切之政行狗且夕之譽希不貲之賞其視百姓休戚蓋無所輕重於心而又奚望其去後之思也公治烏不爲誇炫目前計惟求民所不便者而去之捐脫聲勢刻落苛深剪除垢穢罔以庭無留滯獄無枉濫民入公府如歸其家往役往賦各畢其事而無敢後者乃若常祿不盈饋遺不入則公之廉也退食不肉儀具不飾則公之儉也喜怒不見有犯無較則公之量也聽斷無心不泥成案則公之虛也簡徭汰冗約已裕民休風惠蔭莫可殫述使今世有遷固者出而傳循良則公豈在文衛諸賢後哉夫祭法法施於民則祀之公善政不愧於古哲儀刑可信於將來施莫大焉以是而廟食茲土夫誰

曰不宜嗟夫世有良吏斯有良民狙可使懷鱷可使馴固不特桐鄉桂陽之民能慕德而好義也孔子曰斯民也三代之所以直道而行也吾於今日重有感焉公名允哲別號蘅渚松江上海人前左都御史笠江翁之適長也笠翁歷官中外所在著績爲一代名臣今蘅渚前爲新蔡則新蔡治後爲義烏則義烏治具有遺愛豈非其家範然哉祠地廣八丈五尺深九丈繚以周垣爲堂五間以供尸祝爲門房七間虛中出入兩廊店屋構其一歲共收賃二兩八錢以備修葺推鄉耆三人輪掌之率以爲常罔或侵墜斯父老永懷之意也是舉也鄉耆一十五人皆以德行推任厥事勞費居多竝得序其名於碑左焉

歐陽公德澤祠

祀邑侯歐陽公柏潛江人在潘祠右鄉賢祠前堂三間門房五間中爲門出入餘收賃於公誕辰祭祀縣

民陳伯鶴金香朱潮金一元等率衆同建

朱湘記義鳥於婺為

劇邑宦若土者自昔稱難比因南北徵兵壯夫棄其
穰鋤之業爭事行伍於是逋賦日積訟益繁而盜益
熾公私匱乏莫可支吾蓋自是愈稱難治矣隆慶已
巳潛江歐陽侯茂野受命來為宰既至勵精視事召
邑中父老引問疾苦察民所不便悉更之杜奸竇塞
私門常祿之外不入埃塵公家之費不饑涓滴察遠
而行恕意詳而法定懲奸庇良伸冤理枉居數月邑
用以治乃下令禁民應募非奉旨調發不得遣常賦
之家悉簿錄其姓名第其稅之多寡摘其頑猾者一
二懲之而逋賦立舉訟者至公庭詰其隱無遜情情
輸卽弗竟其罪人咸感侯又知侯難欺訟由是日減
盜之熾也窩在土人侯廉得其狀令保正副以時覺
察籍其名於官有犯則按籍擒治之由是窩不敢匿
盜背其境或事發他郡多株連邑人勾攝之使相望
於道侯察其寃不遣悉為申雪所全活甚衆逾年邑
以大治侯於是慨然以興廢墜為已責文廟就圯經

費無所出侯乃捐俸積羨鳩工飭材不再月鼎新如
故遂次第搆復兩廡復敬一亭復啓聖祠徙復鄉賢
名宦二祠新四賢之宇屋東江之橋不廢公家一錢
民間一力而故墟通津煥然易視矣於是若士若民
胥慶侯之庇吾邑而侯亦不知吾邑之為難也壬申
夏侯以再績內召將行父老涕泣思挽侯不可得乃
相與立祠祀焉而徵言於余余惟修政以和民令之
善德也崇祀以志思民之厚道也昔崔子玉為汲令
有惠政官吏男女相與壘石為壇而祀之晉荀勗治
安陽遺愛在人人為之生祠焉夫崔荀豈有期於汲
與安陽哉令修其政民志其思其施報然也惟侯宅
心民瘼巨細不遺視邑事如其家事惠政遺愛軼崔
荀遠甚然則血食是土也顧不宜歟顧不宜歟余烏
人也不能為侯宣揚卓異而幸父老之有是舉也於
是欣記其事以詔來者祠址徑入丈衡七文為堂者
五為門者六前欄繡湖背倚名宦清風芳躅輝映後
先歲時伏獵酌水於湖採芹於泮可以獻侯矣如有
嗣侯者其知所感也夫侯名柏登戊辰進士江兩秦

和人宋歐陽文忠公之適裔也潛江其附籍云

范公生祠

祀邑侯范公儁高安人在儒學門左堂三間繚以周垣縣民吳承乾金燦朱紱等建

金公遺愛祠

祀邑侯金公繼震休寧人在縣首之東廳三間前樓三間門樓三間虛中出入餘收賃以祭縣民黃承泗

金一道孟思課許廷鵬等建

邑侯周廷待記

周公遺愛祠

祀邑侯周公士英武進人朝陽門西堂三間門屋五間虛中出入餘收賃以祭縣民同上建

參政虞德燧記

張公遺愛祠

祀邑侯張公維樞晉江人在渡春橋西堂三間門屋六間虛中出入餘并鄉耆捐貲買塔山一十八畝應

祭縣民同上建

兵部朱懋芳記

朱公遺愛祠

祀邑侯朱公顯文莆田人在東嶽官左堂三間門屋三間虛中出入餘并鄉耆捐貲買惠民藥局店一間

應祭縣民同上并金德堅朱一清龔純臣鄧實大等

建 朱懋 芳記

周公遺愛祠

祀邑侯周公廷侍金壇人一在繡湖北嶽帝廟左廳

三間門屋三間虛中出入餘收賃以祭縣民虞某等

建一在縣治南關帝廟側正廳一座圍以周垣 東陽 太常

寺少卿許 弘綱記

吳公遺愛祠

祀邑侯吳公尙默涇縣人在大司前路左廳三間堂

三間繚以周垣虛中出入縣民金希孟樓士紹紳金

希聖庠生金世僑等建

邑侯張九恭邑人文 選司郎中金世俊記

貢侯遺愛祠

祀署事東陽知縣貢侯修齡江陰人在渡春橋東堂

三間門屋三間虛中出入餘收賃以祭縣紳金漢芳

民某等建

邑吏部四司郎 中金世俊記

許公去思祠


祀邑侯許公直如臯人在大司前街右堂三間繚以

周垣縣民某庠生金以楨世僑漢翀建

教諭古越史 起夔許侯德

教碑記夫世所貴以經濟與實能有功於國家者天下惟士而已矣故古之名卿大夫必以興學教士爲先其最著者若蜀郡之文翁江寧之晏殊載在史冊今發奸摘伏代不乏人而文教寡著良以簿書期會旦夕責程易見殿最而陶鑄人材効乃在十年或數十年之後不無迂緩相視或者志修舉矣苦於歲月之不給教未裕而廣進之居上者以爲第私其邑也進不廣而強督之居下者以爲第厲夫已也孚於上下而造福多士莫如我侯許公爲最公當爲士之日卽以表率爲已任故未出而人樂得以爲友一出而人爭得以爲師筮仕得義烏公曰是昔顏孝子駱中丞宗忠簡之鄉也忠義之風一傳而爲王忠文再傳而爲龔忠愍詎文章一脉遂少傳而彪炳者風厲在我耳下車卽進多士而教詔之自庠士以至下里能摻觚者罔不口授手指諄諄如父兄之於子弟月有課歲有程較閱評隲之屬靡弗精抑囂競獎恬退道德性命之訓靡弗殫飭祭器以妥先師建閣濬湖以助形勝裨益勸相之事靡弗舉諸士亦蒸蒸日新月

盛依公如父母公曰是可教也已吾不可無以鼓之居無何值學臺按郡公力請廣額上之大府大府嘉歎亟申學臺然是時上方振飭紀綱裁抑僥倖嚴覈取數學臺一切遵法從事婺屬八邑半有所裁而烏獨得視舊爲贏從大縣之例實由公教迪有素久著上臺而多士漸濡公教材足廣收故上臺咸樂從也事旣竣諸士相顧而言曰孰使今烏之文不猶昔烏之文者非我公乎孰使今烏之額不猶昔烏之額者非我公乎採厥貞珉不謀同辭問記於余小子余曰諸生以此足重公邪余事公兩載見公均繇役禁豪猾恤熒獨寡誅求病則給藥貧則蠲贖公未嘗幾微見顏面欲人知之而以世俗之言諛公豈公意哉諸士曰不然有其實而不居其名我公之所以畜德也食其惠而不忘其自吾黨之所以志感也且吾黨不襲名公大人之虛辭而乞言於先生貴其言之信而可徵也余小子旣不敢辭因以其言載之石而更祈夫二三子服公之教無徒效法於文字之間而取公之立心制行少見一斑亦足以應國家之用處爲名



士出爲名臣他日遡厥源流不惟公之志大伸雖以
余小子之不肖且得藉是以不朽也已是爲記公名
直字若魯號柱玉維揚之如臯人弱冠聯魁鄉會成
甲戌進士方以卓異矜膺內召云崇禎九年五月誤
邑工部侍郎金世俊記廣陵許侯以高等進士來
領余邑始至民畏之繼而民安之久乃信之且愛戴
焉甫報最俟艱去士民罷市奔哭臨發哀號追送有
至數百里者皇皇如失慈母公去踰年而思之彌切
相與鑿金祠祀之旣成士民相率請記于余余惟民
思召公愛其棠樹故不必祠也若等思許公惟士服
其教民狎其政以無忘許公之德則許公去而猶在
以是爲生祠許公不亦可乎余畸人也江州雖賢未
聞淵明作頌文麗牲之石恐非柴桑耕叟事也士民
潛然日思德故不在祠也然桐鄉亦藉此以寄朱公
之思千秋以爲美談惟先生之悉許公深也言乃信
而有徵非先生記之而誰也余歎曰公德之入人深
也思其德低徊其政思其政彷彿其人而隳焉倘悅
焉於羹牆俎豆間相寤寐也非余記之而誰也蓋公

深識遠慮神靜氣恬本人情爲調劑而骨峻嶒不可
撼主上加意吏治勤恤民隱公恪遵功令務竭心集
思爲烏人利安計先是賦有那透課不中程吏鮮及
格公至則清釐惟正絕其耗蠹民相勸若干來不待
期集而課更以最邑故有劇盜萑苻時警公廉其魁
渠而置之法仍拔其根株窟穴夜戶遂可不閉丙子
亢旱赤地數郡市價翔涌斗米數百錢公停徵止訟
徧零羣望多方拯恤出官帑千餘金移粟于南汎舟
相繼減價以紓民收其價以償官轉移敏便民困以
甦而官帑無缺額可謂救荒良策而又賑貧者粥饑
者藥弭病者所全活不可勝計聽斷明決以片言折
兩造各吐肺腑庭往往空若洗公旣多清燕則朔望
行學朝諸生考校經術擇其敏者而日課之齒借翼
飛不遺餘力所賞拔多雋發洵大有造於烏矣蓋公
秉心以寬而先之以嚴及令行事集則盡剗芒角爲
簡易以故士懷之民戴之卽吏卒諸人凜凜奉法亦
更相謂曰事許侯無他苦苦貧然至今不遭覈按也
語有之政如農功思其始而成其終行而越思如農

義烏縣志 卷之五
之有畔其過鮮矣子產之治鄭也褚衣冠而伍田疇
初政人咸落落及三年而與人歌之夫亦先有畔也
公可謂真知政矣古之遺愛也公善政未易更僕茲
所臚者若夏畦之偏澤而巨獄之燭勝耳夫焉足以
爲公盡也朱邑有言曰子孫奉祠我不如桐鄉之民
此非可以聲貌襲也公之祠祀且軼朱桐鄉而上異
日者人贊聖明澤寰海垂景耀我烏得爲公桐鄉不
托豔千秋乎父老曰善請書而碑之祠以志永永公
諱直字若魯甲戌
進士廣陵如臯人

講仁祠

祀

知縣張公永誠

劉公同

縣丞劉公傑

知縣羅公柏

歐陽公柏

范公儻

熊公鳴夏明崇禎十三年知縣熊人霖建

熊人霖記

夫祀者人治之大節也政之所由成故仁者講功法
施於民則祀之其在成周甘棠作咏漢世則有桐鄉
之祠蓋亦甘棠之遺云後世尸祝循吏者彷彿之人霖
承乏義烏祇謁名宦祠則穆廟以前祀五人而吾鄉
先哲居其二曰張公永誠曰劉公同神廟時祀九人
則吾鄉居其二曰歐陽公柏曰劉公傑已攷前令之
生而尸祝者祠凡六而吾鄉居其二曰歐陽公之祠
曰范公之祠哀之也吾鄉理學節義源濬流長彬彬

多君子也已考邑乘宦蹟吾鄉之先哲在元則有縣尹周公自強國朝則有知縣羅公柏熊公鳴夏縣丞王公輝主簿張公景金公國珍典史鍾公鳴教諭辛公榮訓導葉公維大之數公者其清儉剛正載在簡冊讀書論世君子哉若人魯無君子者斯焉取斯會范公祠圯歐陽公祠亦垂敝邑三老陳陽春陽夏者本吾鄉弋陽人而僑居此地長子孫有青青其衿者矣追慕先哲慨懷典模問在昔三老之祠歐陽公范公者其後有人乎則今三老金希臯李洵是也鑿金而謀所以爲二祠新者爰改正范公祠門南向取諸近聖人之居而不背也又請合歐陽公主入祠而以歐陽公故祠地改爲僦房取僦直供春秋享祀費已又以劉公同熊公鳴夏爲請曰故老言二公爲政甚宜民舊有碑亭今歲月久就圯請竝以祀人霖肅容而答曰唯唯善夫金希臯李洵之能守乃祖訓也匹夫慕義肯堂報功貽厥孫謀誠俾勿敗可不謂克率乃初哉善陳陽春陽夏之考獻也處新土而誅膏澤不忘上也思故土而敬衣冠不忘本也皇祖之訓有

曰孝順父母尊敬長上是其庶幾焉雖然君子必有敬也必有敬所敬也張公永誠劉公傑載在國典矣是先哲之所敬也合而祀之神其妥哉周公自強之不敢祀也以在元世也丞陳公紀王公輝簿張公景金公國珍典史鍾公鳴之不敢祀也以佐貳之效于民者不能如令之專故存其蹟而不敢耐焉不祀猶祀也教諭辛公榮訓導葉公維大之不敢祀也士懷之法之施於民或未徧也夫祠固民之所以講功也於是三老暨孝廉文學咸講于邑之元老左司空金先生而定厥主焉曰知縣張公永誠曰知縣劉公同日縣丞劉公傑曰知縣羅公柏曰知縣歐陽公柏曰知縣范公儁曰知縣熊公鳴夏祀者凡七人皆爲木主以庚辰之嘉平望日合邑之薦紳先生孝廉文學與其耆老旅拜於祠下以妥焉著之版曰歲春秋二仲之望以少牢祀三老董事者子子孫孫世世引之歸賑於縣與儒學表風聲也餽餘於同祀者昭有恪也舊碑獨歐陽公碑存遷於新廟茲別爲碑記合祀七賢而節錄舊乘之蹟庸章懿好亦附錄前所紀佐

貳學官有蹟者使後之人有所法焉夫為義烏祀也者甘棠之思豈獨我鄉先哲然為范公歐陽公祠也者維桑與梓敬其所敬合堂同席而祀豈非禮之可以義起者哉爰為銘 銘曰匡廬峩峩彭蠡洋洋徐孺表漢彥伯著唐歐會藻敷文謝節揚餘干倡學從祀宮牆格人輩與指計莫殫經術吏治德義衍衍起家華川光昭汗簡南昌張公載其清淨信而後勞子來斯競廬陵劉公邑乘是珥平反恤災不吐不茹時佐縣者樂平之劉弭盜寬租章獻表幽吉水羅公鋤暴植弱疆項公廉去邑垂橐文宗哲裔學紹廬陵政先風教治尚嚴明高安范公克勤克勵履畝均賦世載厥利維我宗衰來自豐城華川長山咸頌廉平小子不敏起家承乏欽慕緒風率循良法嚆嚳故老翼翼時英表揚遺愛右迪後生新廟有奕合祀有秩敬哉敬哉以思無斃

按丙申原志邑侯潘歐陽范三公祠後來補志金周張朱周吳貢許八公祠並次顏宗諸祠前尊長吏也

然顏宗諸公皆百世士不得以縣人域之他亦依擬相附而長吏之見思不妨居後至碑記如潘歐陽諸原補志俱別載職官表後今入祠下而講仁七傳取附官傳無祠有碑者亦依世附於官傳碑前分別小述硬

丘墓

武王封比干之墓漢帝下仲舒之陵稽諸先賢名臣墳墓樵牧有禁明律嚴之非僅曰君子登壟而生哀也卽如義邑秦樹啼鵲不聞而烏泥口血猶在滇雲化碧不返而鐵膽忠魂已招他若楓塘指穴靈隱之跡自傳京峴成丘滿心之響弗絕誰謂徐南州劉屯

田之不當植封表而立門牆邪

秦

顏孝子墓

縣東北四里在崇德鄉崇德里方廣四十五步高一丈五其西三步孝子父墓也宋大觀四年知縣徐秉哲建亭其側後燬於寇歲久莫知墓所向紹興十五年知縣黃表因禱雨感格命陰陽家正定立石表之乾道二年知縣林元仲返民所侵地修其塋域未幾仍為墓鄰跨占淳祐元年邑人兵部郎官康植言於有司地乃復歸既表以刻辭端明殿學士大中大夫簽書樞密院事魏了翁又為篆題表之曰秦顏氏烏傷墓直徽猷閣權發遣兩浙路計度轉運使魏陵立石邑人何恪碑記永嘉林侯元冲宰義烏下車未遑他事首訪顏孝子之墓曰邑由孝子名長吏宜致敬焉即束帶趨駕出邑之東四里展拜墓下禮容甚肅見二冢纍然蔽叢棘中狐兔交跡樵牧不禁侯愀然易色曰何以底民孝哉越明年

政成將去又部刺史列其治狀上於朝侯於是證圖牒盡反民所侵塋地繚以崇墉其石壯其址篳覆其上嚴局鑰以限薪樵畜蹂藉松檟數十百株表顏孝子墓四大字于道周使過者必式之庀工於乾道丙戌秋七月且闕月而就迺二千里走書禾川諗予曰子粉榆也為我碑冢上庶俾後人明吾心無替封植則顏氏墟墓永有托且以善百里俗予觀漢承秦風俗大壞之後未易遽還於古自嬴政徂祖昭以子遷廢其母家習於見聞不為異卒身受其報死巡幸胡亥兄弟起相屠至於鮑魚雜腐齧載輻涼遺臭億齡劉季固英主忍出分羹語呂后失母道不哀其子逮太宗時號為黎民醇厚訊賈生言則德色借鉏諄語取帚其遺風故在也孝子以匹夫有至性獨不移于習俗親葬自負其土感烏噉泥來助吻為之傷因名縣曰烏傷其後改曰烏孝或曰義烏皆必本於孝子故邑跡他縣曾無一姦民諱亂荏蒲繁孝子立其間也且自古至富貴人丘壟雖固南山徹九泉亡不破者而孝子阡由漢迄今數千百年巋然獨存惟令君

又從而旌護之則聞其風者孰不知勸哉侯忠孝人也御太夫人官吾邑其政嚴而不殘者時出於榮平反之一笑也既帥以身又厲之以孝子類非俗吏之所能爲也予旣爲記其實又繫之以辭曰由漢迄今餘千春錮銅斲漆知幾墳陵谷變遷不可尋顏氏有汗歸然存孝肉順骨世所尊馬鬣蓬顆幾何分烏兮無知猶能馴肯有襟裾忘其親因以名縣淑吾民爲之長者宜益敦一本抔土或見侵會禽不如何足人乾道三年記 宋蔡抗烏傷行之子顏氏古遺民孝哉一念何其仁葬親悲號躬負土烏亦感動來填塋羣飛銜泥嘴流血到今言者爲酸辛至忱真切禽可格况乃孝弟人性均天下未有無父國烏傷昭揭千古名愛親欲養親不待承顏愛日宜兢兢我來摩挲墓前石悲風颯颯生松陰康侯有句表行路見者淚落天理明天理流行曷嘗息聞風相率孝以典顧永感兮摧肝心土不及負空雲程 郡人魯齋王柏次韻維天降衷于下民暴秦莫殄心之仁孝哉顏氏一有感畢逋銜土成丘塋彼亦莫知其所以自甘血嘴

晉
含餘辛志壹動氣氣動志鳳儀麟獲理亦均環百里地盡疆井千有餘載蒙嘉名繡衣使者迂六轡下馬肅拜心凌兢大書瑰辭鎮松柏便有山鬼呵崖陰明刑彌教期無刑何如先使教化明流傳墨本到比屋有人心者俱作典但願人人嘗此心安得作亂干章程 元黃潛過墓詩丹青像設始何年翁仲遺墟自古傳時有北人來下馬不知秦樹幾啼鵲牧童解指看碑路野衲分耕祭墓田回首長安西日外茂陵松柏正蒼烟○古志作墓 明弘治間樹碑方廣四十丈餘見祠崇禎間知縣許直請立奉祀生

東海太守朱垣臨海太守朱汎二墓 竝在雙林鄉蜀山里之下宋昇

明元年用望氣者言遣兵鑿山破墓其子孫招鬼改葬蜀山西原

金威將軍朱禮墓 雙林鄉蜀山里之赤岸見古志

梁

侍郎樓堰墓 縣西香山萬曆間撫院立碑

唐

駱賓王墓 縣東三十里上楓塘邊崇禎十三年守道萊陽宋公率知縣熊人霖重修立碑

蕭王冢 縣西六十里覆釜巖見古志

太尉鮑祿墓 縣西十八都蓬塘之源見古志

宋

宗忠簡公澤墓 在鎮江之京峴山歲久湮蕪郡人劉伯靜守鎮江修治其墓廬陵楊士

奇書復立宗忠簡公墓碑卷後為政在使民知為善而已而非有以勸之民或不知為之也故尊德禮賢

表孝友褒忠節皆勸民之務也宋宗忠簡公其孤忠大節所謂皦然可與日月爭光者而竟以譖憂憤死蓋天下後世所共仰慕而悼惜之者也然葬於潤無三日年已莽然荒烟塞草之墟樵牧往來行道不弔此豈潤之人其心獨有異哉公嘗仕於此居於此至感慕德義吾意潤之人必有深於天下後世之人者何為獨漠然若是也非由為政者不達勸民之道雖有公之賢不知敬禮而致民之然歟今六七年前金華劉侯伯靜以監察御史出守是邦一新政教修舉百廢乃復葺公之祠及治其墳塋又經紀其祠田命佛氏之徒董祀事而躬率博士弟子展禮墓下又刻石墓道使過者皆知為宋忠臣宗公之墓於是潤之人始知有忠簡公又知為善者之久而不泯而在已不可不勉於善也劉侯為政可謂知所務矣去年與劉侯同在史館為余道其事今侯去潤而佐江右大藩自昔江右孤忠大節如忠簡公尤多而江右之人固不為潤之人之漠然也將侯所以加勸之者尚能拳拳如治潤之時乎光祿大夫柱國少師兵部尚書

錄事參軍何恪墓

和溪

太平主簿陳炳墓

十一都全陂

左司朱元龍墓

浦江縣東二十里雙溪之原

侍郎朱質墓

雙林鄉巖菴

監察御史龔愷墓

縣西五里

尚書戶部黃夢炎墓

縣東二里上者塘之原

知府童必大墓

縣南五里銅山之原

進士吳大年墓

龍祈鄉溪西之原子郡馬璞耐葬

南稜王炎澤墓

縣西五里湖陽山

戚仲咸墓

雙林鄉下黃潛銘見府志

元

黃文獻公潛墓

縣東北三里崇德鄉東埜山之原

丹溪朱震亨墓

縣南四十五里東朱山墘頭菴

明

王忠文公禕墓

縣南十里青巖象鼻岡禕死節雲南子紳與孫穰稔奉神主招魂以葬子

綬紳皆耐左右 建安督學李默記先生與吳忠節先後使滇皆見戍孽類朝廷度不可以文告撫定乃移師討平之有以吳事聞者詔馳驛護喪還葬并錄其子而先生子紳以洪武末年求遺殖於所謂地藏之墟則黯然夷矣當是時高皇尚在御紳任親藩雅以事情見哀賢王守臣征南公又上心膺臣也曾不

能爲天子言待制仗節事革除初紳始自言之贈奉
議大夫翰林院學士諡文節國統旣易事遂不顯垂
四十餘年有司猶不敢舉舊諡以爲時諱稍因正統
詔書言狀得再諡忠文贈官如故二公身後其所遭
又有幸不幸如此嗚呼先生不愛一死以終令名而
當時執事之臣膠吻辭舌反不能發明忠憤俾易名
之典久而後伸是何平居紛紛多愛身士邪嘗讀顏
魯公傳未嘗不廢書而歎也公歷躋臚仕以危言正
色動遭擯斥晚爲虛杞所中遣使希烈李玄卿輩皆
知其弗利卒隕賊庭爲天下慟國史稱先生爲人剛
直不肯苟附以取謗毀爲起居注遇事敢言無諱尤
爲胡惟庸所忌故黜之遠裔以窮死然後知忠鯁違
物直道禍身古今一也豈不痛哉夫瑰偉跌宕抱奇
節之士苟足以明志誠不顧死先生年德位望未知
孰與魯公覽其蒙禍操志蓋有同焉去今百六十餘
年先生死事之跡視吳尤著何則吳公倉卒爲同行
所虐其事微先生慷慨陳天命義不苟辱其禍烈矧
陵谷變遷而地藏寺巋然固存殆天所以表遺靈也

先朝嘗爲先生特置祠思先生又卽寺旁樹碣當孔
道間以識不忘所謂物毀而道光身滅而名愈揚非
邪嘉靖十又八年春副使朱君良矩思爲先生治冢
舍其處乃及參政車君炳文以狀白于節鎮大中丞
汪公公曰吾規此久矣幸卒成之會默視學且至遂
下有司如二君令築祠一區祠北封土爲墓加樹焉
改題其碣曰皇明詔使王忠文先生墓并置守冢卒
一人而昇耕者他旁地以給祠費於是先生之跡之
名賴公益振雖微全要領以從九原然已崔嵬如堂
如防與延陵徐孺子墟墓爭賢矣過者有不獻欷下
泣者乎昔王仁裕著錄稱魯公遭難後十餘年家僕
見其衣白衫張蓋歸城隅李衛國亦謂公收葬時猶
曠目如生嘗被羽衣行山澤間蓋道家所謂尸解類
也先生精英颯爽放薄上下有化爲列仙降爲明
神奚不可者而豈賴於枯骨邪故先生可墓可以
無墓墓而記之所以哀死而勸生也教道存焉爾

青村金涓墓

縣西南一里
許金菴山

贈都給事中龔印可墓

繡湖西見古志

侍講學士樓璉墓

智者鄉張塘之原

都給中龔泰墓

縣南五里崇德鄉置馬塘山

監察御史趙勝墓

縣南十五里橫塘角

勅葬南京大理寺卿龔永吉墓

置馬塘山

進士吳福墓

縣西十五里白鶴山

孝莊王稔墓

二都黃荆墳

中書舍人王汶墓

縣南十里青巖象鼻岡

敘州府推官謝愷墓

縣東駱王尚山

贈副都御史虞尙禮墓

縣東三十五里東山西見古志

監察御史虞守隨墓

縣東四里鮑壽山

大理寺丞李鶴鳴墓

繡湖西北金村山石

封刑部郎中王敏墓

湖陽山見古志

贈解州知州虞鈺墓

水浸原侍郎程文德誌見古志

按察司僉事王宗聖墓

縣東北三里上山之原

知府虞文詡墓

孝子龔曇墓

繡湖西山

同知金江墓

二十五都蜀山旁

封都御史吳瓊墓

見古志

刑部侍郎虞守愚墓 五都荷花心

朱封君鴻墓 十一都黃塢山原見古志

刑部尚書吳襄毅公百朋墓 二都青龍山欽差工部主事王再聘造墳遣分

守金衢右參政張希名諭祭葬禮部尚書兼學士汪鏗狀太子太保禮部尚書文淵閣大學士馬自強誌

銘

刑部員外郎朱湘墓 十一都洪堂山郡人陸鳳儀撰狀邑人虞懷忠撰誌龔一清撰

表

副使龔一清墓 二十四都子龍山

主事龔一清墓 二十八都照山之原

知府虞懷忠墓 南光祿寺署丞金世傑墓 練樹橋

副使樓鎮墓 八都金山之麓

贈大理寺卿金文亮墓 縣北六十里晉濟寺前山

雲南左參政虞德熿墓 低林

刑部尚書金世俊墓 龍旗山 丹陽主簿朱應相墓 三都塘

鹽運司運判陳思任墓 二十都三都

國朝 金世傑墓

封光祿寺卿涇州通判金世儼墓 二十八都棲霞山

總督河道兵部尚書朱之錫墓 金華孝順街

光祿寺卿金漢蕙墓 城北孝子門右

贈刑科左給事中金德義墓 十一都葉宅

鴻臚寺卿金光墓 蜀水塘

遼陽知縣陳達德墓 十一都石蕩

翰林院檢討虞國鎮墓 五都殿口

溧水知縣龔士驤墓 八嶺

訓導虞光濬墓 六都羊店 廣州府推官季奕聲墓 宗宅

贈大理寺卿金守憲墓 湖西樓村

教諭吳主一墓 二十三都江南青街下

義烏縣志卷之六

典禮志

令外吏也所宰不踰百里而

朝廷之大章程大命令及有司歲皆慶祝宴饗諸儀與

民間喪祭嫁娶輿服宮室之節必頒焉且並載會典

以示遵守稟上則儀不愆近民則戶可曉由是而講

諭申約所謂水行表深使人無陷治民表亂使人無失

也抑記有曰朝聘之禮廢則侵凌之漸起鄉飲之禮

廢則爭鬪之獄煩婚姻之禮廢則淫辟之罪多喪祭

之禮廢則骨肉之恩薄然則皆趨世變宜從宜改損
益參之故取歲時風俗舊次於山川橋渡之後者摘
附於此

慶賀穿朝服日期儀

舊志聖節正旦冬至慶祝禮儀洪武間定凡遇正
旦冬至聖誕之辰各處司府州縣官公廳各齋沐
具公服行禮
後改用朝服

國朝康熙二十三年六月內禮部等衙門具題奉

旨通行

元旦令節七日

止元節三日俱穿朝服不理刑名

太皇太后

皇太后聖誕令節一日不理刑名

皇上萬壽聖節七日穿朝服不理刑名

前期一日縣官率僚屬生員吏典耆老人等具龍亭
儀仗鼓樂往按察司習儀畢遂設龍亭香案於公堂
列儀仗于左右是日清晨衆官各以序列于堂下班
定行三叩頭禮班首官進詣香案前致詞祝曰某衙
門某官臣某等荷國厚恩叨享祿位皆賴 天生我
君保民致治今茲正旦○冬至○聖旦 聖壽益增
臣等下情無任忻躍感戴之至祝畢復位又行三叩
頭禮然後搢笏舞蹈山呼遂三叩頭而退 三叩頭
舊作
四拜

千秋節

儀與前同但致詞後不舞蹈山呼

祭享齋戒日期儀

各壇廟祭享齋戒日期不理刑名

穿素服日期儀

忌辰一日穿素服不理刑名

封印日期

每月初一初二日期俱不理刑名

四月初八日不宰牲不理刑名

開讀

詔赦儀

凡朝廷遣使及詔赦至本縣官員具龍亭綵輿儀仗鼓樂出郭迎接朝使下馬取詔書置龍亭中南向朝使立於龍亭之東各官具朝服北面行三叩頭禮衆官及鼓樂前導引朝使上馬在龍亭後行至衙門外衆官先入分東西序立候龍亭至公庭中朝使立於龍亭之東西向如有出使官員贊者先唱日出使官行禮禮生引出使官於公庭露臺上行三叩頭禮畢於露臺之上東向立如有武官分文東武西班定樂作行三叩頭禮朝使捧詔授展讀官展讀官跪受詣開讀案宣讀出使官於露臺北向跪衆官皆跪宣讀訖開讀官捧詔授朝使朝使捧詔置龍亭中衆官俯伏行三叩頭禮舞蹈山呼又行三叩頭禮畢本處官班首詣龍亭前跪問聖躬萬福朝使鞠躬答曰聖躬萬福衆官乃退易服而見朝使行

兩拜禮朝使答禮禮畢復具鼓樂送詔于官亭 三叩頭舊初作五拜三叩頭次作五拜三四五作四拜

迎春儀

每歲先期該戶如式造春牛及句芒神於東江上至立春前一日見里結綵亭具儀導各官服紅袍輿迎於東江橋由迎恩門入至縣門外土牛南向芒神在東西向至日清晨陳設香燭果各官具朝服四拜班首詣前奠酒者三與而復位又四拜各官執彩仗列土牛兩旁長官擊鼓各官環擊土牛者三遂碎之而退

日蝕球護儀

前期結綵儀門及正堂設香案於露臺上向日即於香案前布各官拜位向日立集金鼓手於儀門內至期陰陽官報日初虧各官具朝服行三叩頭禮皆跪執事者捧鼓詣班首前擊鼓三聲眾鼓皆鳴候報復

圓乃三叩頭而畢禮退

三叩頭舊作四拜

月蝕球護儀

與日蝕球護同

新官到任儀

凡新官到任未到城一舍而止官屬及父老出城迎謁令灑掃在城應祀神祇祠宇備牲醴祭儀至城館於後司齋沐詣城隍廟宿壇次早禮吏陳設牲酒等物新官與同僚各以班立行三叩頭禮新官詣神位前酌酒行初獻禮執事者讀祝維某年月日某衙門某官某奉命來官務專人事主典神祭今者謁神特與神誓神率幽明陰陽表裏予有政事未備希神默相使我政興務舉以安黎庶予倘怠政奸貪陷害僚屬凌虐下民神其降殃謹以牲醴致祭神其鑒知尚享讀訖俯伏與亞獻終獻皆如初儀遂四拜而退導

引至本衙門前具公服從中道入於露臺上望闕設
香案行三叩頭禮乃升堂排衙報時押公座畢易公
服便服而坐合屬人等自卑而尊以次參見然後與
首領官佐貳官行相見禮乃諭僚屬曰朝廷設官
置吏欲其敬神恤民親賢遠奸興利除害某不敏忝
茲重任尚賴一二僚屬及邑中長者匡其不逮庶免
後艱其四境之內利有當興敝有當革者某等當共
勉力爲之以安黎庶論訖署押公文處置公事畢將
所祭牲醴與官屬父老享飲而退以後凡遇外境
出入卽於本衙門外設壇總祭其九年考滿仍具牲
酒率父老人等致祭就以祭物出郊餞別而
去三叩頭舊前作四拜後作五拜三叩頭

鄉飲酒儀

明洪武初詔中書省詳定鄉飲酒禮條式使民歲時
宴會習禮講讀期於申明朝廷之法敦敘長幼之節
遂爲定制十六年頒行圖式每歲正月十五日十月
初一日各府州縣於儒學行鄉飲酒禮士庶行於各

鄉酒肴於官錢約量支辦務要豐儉得宜本縣以知
縣爲主位於東南如無正官以佐貳代以致仕官年
爵高者爲僕位於東北以鄉人年高有德者爲賓位
於西北其次爲介又次爲衆賓位於西南又選有德
者一人爲司正今以教諭爲之以二人通文字者講
讀律誥今以生員爲之各鄉則以里長或糧長爲之
主焉○前一日執事者於儒學之講堂依圖陳設坐
次司正率執事習禮至日黎明執事者宰牲具饌主
席及僚屬司正先詣學命禮生速賓僕以下比至報
賓者先入日賓至主席率僚屬出迎于庠門之外以
入主居東賓居西主揖賓而入至中門又揖而入三
揖至階三讓而後升堂東西相向再拜主賓以下各
就席贊唱司正揚觶主賓以下皆立司正詣堂中北
向立舉酒揖衆賓而言曰恭惟朝廷率由舊章舉行
鄉飲非爲飲食凡我長幼各相勸勉爲臣盡忠爲子
盡孝長幼有序兄弟恭內睦宗族外和鄉里無或
廢墜以忝所生讀畢司正飲酒授觶相揖而退主賓
以下皆坐唱讀律誥執事者設律誥案於堂之中主

賓以下皆拱立行揖禮如揚解儀然後禮生展讀律
誥有過之人俱赴正席立聽讀畢復揖而退主賓以
下皆坐執事者具饌酒三行湯畢主酌酒獻賓再拜
而退賓酌酒酬主亦再拜而退執事者分由介三賓
衆賓以下以次斟酒于席或三行或五行供湯三品
畢徹饌主賓以下皆起東西相向再拜送賓以次下
堂分東西行仍三揖出庠門而退里中鄉飲做此
一作大賓僕賓介賓三賓大賓以致仕官爲之位於
西北僕賓擇鄉里中年高有德之人位於東北介賓
以次長位於西南三賓以賓之次者爲之位於賓主
僕介之後又於讀律
誥後歌鹿鳴以娛賓

國朝舉行如舊

按鄉飲酒禮合三達德其中於以興賢
厲俗所關匪細而奉行未善義邑每遇

飲期青衿門斗串同禮胥擇食鄉愚橫科儀賄既沿
門而溷指復護惡而詭揚致使平民視同陷阱莊士
恥若赭衣康熙二十八年知縣王廷會察知其弊示
以鄉飲原期尊德尚齒無煩片紙半文果是其人國
中有口若非其類公狀仍誣自是詐風
旋息潛修亦顯通詳各憲勒石永禁

鄉射儀

明洪武三年令各府州縣儒學訓誨生徒每日講讀
文書罷於學後設一射圃教學生習射朔望要試過
期有司官閑暇時與學官一體習射若是不肯用心
俱要罪過本縣射圃在學宮之東其儀文舊無頒降
嘉靖間督學阮嘗一舉行萬曆間督
學陳亦嘗飭所屬舉行頗有儀則

講

諭儀

聖諭十六條

第一條敦孝弟以重人倫

第二條篤宗族以昭雍睦

第三條和鄉黨以息爭訟

第四條重農桑以足衣食

第五條尚節儉以惜財用

第六條隆學校以端士習

第七條黜異端以崇正學

第八條講法律以儆愚頑

第九條明禮讓以厚風俗

第十條務本業以定民志

第十一條訓子弟以禁非為

第十二條息誣告以全善良

第十三條誠窩逃以免株連

第十四條完錢糧以省催科

第十五條聯保甲以弭盜賊

第十六條解警忿以重身命

按

聖諭十六條頒行已久康熙二十四年總憲陳疏請飭直省通行鄉約將十六條月吉申講如古讀法之禮察其舉行之怠勤以為考課之嚴最自是縣於每月朔日傳集文武官僚紳士軍民齊集鄉約所聽講擇鄉士之學行兼優者令其實心講解務使人人通

曉凜守恪遵

舊志鄉約明洪武初命郡縣里各製木鐸推耆老行
 振之狗道路以警眾其詞曰孝順父母尊敬長上和
 睦鄉里教訓子孫各安生理毋作非為本縣遵遺制
 每月朔引坊里長人等集公廨兩廊老人捧聖諭牌
 至露臺前宣讀勸戒之萬曆十五年知縣俞士章申
 明約訓令八鄉即民祠之寬厥者立為約所選擇約
 長約副主其事做古屬民讀法之令為約書先聖諭
 次條律次六歌俾月朔集眾會講
 溫軍門六歌我勸吾民孝父母父母之恩爾知否生
 我育我苦萬千朝夕顧復不離手豈但三年乳哺艱
 甘脆何曾入其口每逢疾病更關情廢寢忘食無不
 有虎狼猶知父子恩人不如獸亦可醜試讀蓼莪詩
 一章欲報罔極空回首人誰不受劬勞思我勸吾民
 孝父母我勸吾民敬長上少小無如崇退讓分定
 尊卑不可踰輩分前後寧相充闕黨欲速非求益原
 壤不遜會受杖道路崎嶇爭負戴杖追隨共偃仰
 堯舜亦從仁讓來疾徐之間休輕放凌節無損亦薄

德我勸吾民敬長上我勸吾民睦鄉里自古人情
 重桑梓仁人四海為一家何乃比鄰分彼此有酒開
 壺共斟酌有田并力同耘耔東家有粟宜相賙西家
 有勢勿輕使諺有言鄰里和外侮止百姓親睦自此
 始親睦比屋皆可封我勸吾民睦鄉里我勸吾民
 訓子孫子孫好醜關家門周公撻禽為聖父孔庭訓
 鯉見魯誦向乃禽犢愛忍令子孫昏黃金滿籩何足
 貴一經教子言猶存蝶蠟尚能化異類燕翼豈難裕
 後昆縱使不才也難棄長養還須父祖恩子孝孫順
 樂何如我勸吾民訓子孫我勸吾民安生理處世
 無如守分美守分不求自有餘過分多求還喪已農
 者但向耕鑿間工者但向錐刀裏商者行路要深藏
 賈者居市休貪鄙饒他異物不能遷自然家道日興
 起華胥蓬萊在人間民生安業無如是勸吾民
 勿為非非為由來是禍基一念稍錯萬事裂一朝不
 忍終身危淫賭竊劫常相因健訟爭奪與詐欺不勝
 猶或生止心一勝那能有已時力窮事敗網羅隨
 俞知縣鄉約書亭邃古言政必言教至輓近世專言

政不言教間有扼腕談今古者問何以不教執事者
 輒曰民誰率之斯言信然也余亦見執事者著一二
 功令斌斌皆贊揚風美語而民弗率也雖然無徒訾
 民乎子輿氏曰至誠而不動者未之有也不誠未有
 能動者也然則民之弗率無乃執事者未之誠歟誠
 有二皆可以動民躬行仁義先自饒於敦本而後創
 法以修教具誠之上也即已非其人而匡直告戒極
 其殷篤必至徧為爾德始快誠之次也譬之裔人恥
 其子之裔語也而欲習華藉令已自華矣朝夕漸浸
 不教而其子可變倘已猶然裔也而敦華之師引華
 之友與其子俱而已之期責於其間又靡匪實念如
 是而亦何不可化哉此余鄉約之所由舉也余鄉約
 書先之以聖諭六條大哉王言徹上徹下治道備矣
 次之以時政六條一嚴保甲所以弭剽竊之患也一
 禁溺女所以極殘忍之俗也一禁匿婢所以通怨曠
 之情也一禁格殺所以懲一朝之忿也一禁爭婚所
 以訂百年之盟也一輓頹風所以復淳美之古也六
 者皆瑰政而於余治為尤急所以復淳美之古也六

背此而已余於此非不夙夜為勗而媿不能兼盡所
 謂欲華其子而自裔者也提空文以塗民耳目民誰
 與余第余所擇鄉約長約副皆一鄉有道仁人余裔
 而師友華矣而余之慇懃屬望黽勉從事又特起不
 敢康余蓋不誠於彼而誠於此者庶幾民之興乎且
 余治代有哲人顏烏明孝於秦楊機平立功於漢宗
 忠簡竭忠於宋而樓季發駱孝遠輩更僕不可盡數
 即我明王忠文朱悅道龔天民皆命世豪俊是為此
 民者佩周服孔乃其故物古今人不相遠則余民何
 讓焉苟有不待教而興進取於鄉約書之上是又余
 之厚幸也余竊冀之是役也縣丞馬思永主簿陸府
 康典史曾大賓儒學教諭王汝源訓導李度王澹共
 贊成也熊知縣親民釋序粵若稽我太祖統一時
 夏穀羣黎咸若厥生康哉乃我太祖其咨維民既穀
 罔迪亦若驅納諸坎弗克若厥生既敷大誥若雷霆
 庸董于不惠嗚呼維民其惠我迄維求惠庸董曷庸
 迪哉太祖爰作教民榜文皇言維六如金如玉既和
 則篤如菽如粟俾民率育申命臣鄰鐸於民歲時肄

讀以動以沃若風若雨時夏惠胥維臣鄰維民惠哉
 厥克若厥生永罔圯匪攸克惠厥亦罔克若厥生肇
 論迄茲薄海咸歸自東自西自南自北咸聽有鐸薄
 海既和庸不犯于有司世世協于中祖功懋哉庶績
 敘哉維敘維歌左揚于有衆臣人霖未有知受命來
 牧風夜罔敢懈繹思皇言時而颺之弗飾弗阻俾有
 衆咸喻既比以律綴之庸謂歲時躬行鄉里率茲民
 成人小子拜稽首敬聽肅若昊天天之威臨之在上鳴
 鐸擊鼓考鐘間師讀法童子升歌一唱三歎咸動既
 敬敷繹思有則有格進善退惡各正性命維民庸迪
 臣人霖未有知永言釐成日求厥章敷繹思親民哉
 熊知縣六哥孝順父母哥天高地厚海波長這樣
 恩同父與娘不信親恩難報答問君怎樣痛兒郎痛
 兒郎 勞心勞力萬萬千總因兒女計周全養心養
 志須兼盡草木如何報答天報答天尊敬長上哥
 世沐朝廷養育恩設官保護汝生存法嚴分定無爭
 善今日方知長上尊長上尊族長鄉尊總要恭隨
 行後長聖賢從聰明莫倚凌前輩他日須為白首翁

白首翁 和睦鄉里謂難把黃金買好鄰相規相勸
 是相親休將閒氣輕爭訟勉同心做好人做好人
 富漢周貧是福田貧人怨富禍相連施財濟物陰
 功大巧取從來不聚錢不聚錢教訓子孫謂嬌兒
 不教大來癡及早教他莫要遲記得桑條從小鬱兒
 賢方得守家貲守家貲或讀詩書或種田總教勤
 儉做家緣兒孫不教親之過忠信存心作聖賢作聖
 賢莫作非為謂一念非為必不祥天刑王法總昭
 彰心勞日拙因機械作善心開福更長福更長天
 道無親與善人姦欺詐書禍非輕萬般善惡終須報
 遠在兒孫近在身近在身各安生理謂勸君安分
 好生涯本分求財好養家士農工賈皆隨分裁得根
 深定放花定放花衣祿生來莫強求豐年能儉定
 無憂男耕女織家興旺方便公門更好修更好修以
 上六謂每謂中前二人齊唱第四句六人重歎一句
 舊志次學校社學後並以鄉飲酒鄉射俱載禮儀
 改附此按鄉約始呂氏而朱子小學山陰劉子鄉書
 廣鄉書皆足發之要未若

十六諭之簡而盡也嗣當摘萃月朔講
詞引證古人事類成書以示邑人

士庶人禮

民間子孫弟姪甥壻見尊長生徒見師範久別行四
拜禮尋常近別行揖禮奴婢見家長同其餘親戚長
幼照依等第久別行兩拜禮尋常近別行揖禮平交
同 遵明洪武癸酉所定 先是洪武五年令凡鄉黨
揖拜之禮幼者先施坐次之列長者居上如佃戶見
田主不論序齒並行以少事長之禮居親屬不拘主
佃止行親屬禮 十二年令內外官致仕居鄉惟於
宗族序尊卑如家人禮於其外祖及妻家亦序尊卑
若筵宴則設別席不許坐于無官者之下如與同致
仕官會則序爵同序其與異姓無官者相見不

須答禮庶民則以官禮謁
見敢有凌侮者論如律

冠禮

男子十五歲至二十歲冠

洪武三年所定其儀節損益朱子家禮為之品官士庶畧同士大夫多有行者至齊民突而加弁有未冠先娶者

婚禮

行納采納幣等禮

洪武元年令凡民間婚娶並依朱文公家禮行又令男女婚姻各有其時或有指腹割衫襟為親者並行禁止 洪武五年詔古之婚禮結二姓之好以重人倫近代以來專論聘財習染奢侈宜令中書省集議定制頒行遵守務在崇尚節儉以厚風俗違者論罪如律○嘉靖八年題准士庶婚禮如問名納吉不行已久止做家禮納采納幣親迎等禮行之其儀物兩家俱母過求義

烏俗重門第尚糶奩及綵轎等儀窶家效尤富室華門攀附華宗婚男破家嫁女鬻產故十夫而九曠室十室而九溺女甚至有爭聘儀訟官府者遂成鬻女之風而溺女愈不能禁後經奉文行縣合育三女者蠲其差且歲給穀三石助之然莫若遵會典令民崇節儉禁聘娶俱母過求而俗自變矣 近有髮配少亡另連繼室火故魄以媚新昏者示禁乃變

喪禮

士大夫家及鉅室遵家禮儀節行之

家禮作自朱子儀禮訂於丘氏

濬及楊氏慎 明初令天下喪禮服制並依家禮惟父在為母齊衰三年嫂叔服小功與古稍別烏士大夫家及鉅室多遵守家禮儀節至齊民富兒或通賓客飲饌酣呼信僧道靡費錢帛惑風水停柩不葬者祭禮

鉅族多立宗祠置祭產追祀其先祖春秋二仲月合

族以祭生忌節序各祭於其寢又有專祠

祠多附在志內 其

齊民歲肯春秋亦各有奠

明初集禮原本宋儒品官祠堂奉高曾祖禰四世之

主以四仲月祭又有臘日忌日之祭與歲時各節之薦享庶人奉祖父母父母之祀而時享於寢與品官畧同至會典品官家廟規制較詳有遵建者有做浦江鄭氏祠者邑人龔一清日烏俗近古而祠最重無問官民之族咸極棟宇之隆春雨秋霜報本正序比比然矣而家各有譜屬專繕者集字成之亦見不忘原始云

歲肯

元日前夕汛掃室堂及庭五鼓興設香燭男女禮服

拜上下神祇陳果餌酒饌祀其先序拜尊長男子出拜宗族親戚鄰里謂之賀歲家各具酒食相延款

立春前期一日邑宰率僚屬迎春東郊昇土牛芒神

置縣治清晨禮太歲行鞭春禮碎土牛以送寒氣使

民知耕

續因土牛滋費不施鞭碎遞歲相仍加以塗飾

元宵自十三日夜四街設竹棚綵障懸燈其上祠廟

盛張燈遊觀達曙或以火藥為錦樹之戲至十八日

止

二月十五日家長率子孫齊詣祠堂祭始祖及四代

祭畢散胙宴飲

社日春秋二社各村保備牲醴祀土穀神以祈以報

祭畢飲福歸

清明家為青糍蟋螺牲醴祭墓封土埽竹挂紙錢於

顛門壁皆插柳或簪於首

三月上巳先十餘日浴溪民泛龍舟至是日止俗呼

競渡

四月八日民間有為黑黍餽其親友者

寺僧於是日浴佛為黑黍

之會

端午取菖蒲及艾插門戶或繫以綵勝佩於身為衣
香置之篋笥襪菖蒲雄黃和酒飲之以避邪穰毒為
角黍駱駝蹄糕祀其先親戚各相饋遺

七夕婦女陳瓜果祀牛女于庭謂之乞巧

中元家以牲醴羹飯祀其先

緇黃之流誦經供佛謂之蘭盆會

中秋士人家置酒酣燕翫月每至夜分以月餅相饋
重陽士人登高燕賞以茱萸泛酒飲之家製牡丹糕
方粽親戚轉相饋遺

冬至前夕民家各具酒餼宴飲是日具牲醴祭祖宗
亦有行序拜禮者

歲除歲前十日內民家擇吉日祀土神謂之謝年又
具牲醴祭祖宗為飲燕以會其親屬鄉黨謂之分歲
又各以食物相餽至日燒火盆響爆竹換桃符寫春
帖骨肉團藥飲坐以守歲

風俗

俗勤耕織

方輿勝覽 古縣志曰庶民益力於耕桑萬曆丙申志曰前此男子服耕稼女子

勤紡織商賈鬻魚鹽工習器械以利民用無淫巧奇
袤之物又曰苦筋力務織嗇又曰晚近事本業者不
鄙末作以要利 府志稱朱肇
志曰邇來好遠遊而忘本業

好劍輕死

漢志 丙申志曰激烈慷慨有足多者又曰晚近樂巖居者不憚千里以從兵 朱

肇志曰邇來大都好勝尚氣輕鬪健訟爭功利而喜兵革

信鬼神重淫祀

漢志

君子尚禮庸庶敦龐風俗澄清道教隆洽

隋志 丙申志曰前

此富家子布衣草履入城市不馳驅為富貴容親戚鄰里以飲食相聚會或四五簋或六七簋真情款洽重然諾不欺語曰東親戚不若烏相識奉公供賦語官府輒易心喪氣至老死不識縣門興大役動大眾一呼而集競捐私藏不費公帑無俟發徵期會又曰晚近里兒羞布素而尚統綺窳家效富室而列華筵侈靡日甚物力日絀巧偽萌生智作漸毒乃逃國稅捍文網持官司短長而訐告之風熾 康熙癸丑補志曰縣故有小鄒魯之稱明季日趨刁悍抗糧健訟甚至捏造匿名文揭劄害官長甲戶恣凌里長輿丐

肆毆平民知縣于漣每於約所曲為勸誠

俗輕躁少信行

郡國志

人性柔慧尚浮屠急於進取善於圖利

宋地理志

風聲氣習一變醇厚

東陽郡志 古縣志曰士習益歸於醇厚

民多返樸俗尚向方禮義之風遂振

續東陽郡志 貧民不作富貴

人僕 按丙申志云唐敦勤儉而蟋蟀猶有遺風魯崇信義而兩生愈堅晚節蓋言習尚不與昔世為變遷也又云烏風俗可紀者如顏氏子之血誠裕烏宗忠簡之力請回鑿近若王氏祖孫龔氏父子竝以節義輝映後先烏人濡染深矣孔子曰移風易俗豈家至之哉朱肇志謂軌道以定其趨崇德以昭其化非長民者今日之先務乎誠有所不得辭耳

義烏縣志卷之七

賦役志

戶口

昔宣尼歎美衛民之庶說者咸歸功于康叔固知民生蕃盛雖生息常理蓋亦休養之功居多焉我烏邑非險要金革罕罹遡秦漢以來却馬於糞車之轅而玄鬻巷聚黃髮壤歌千億之族所在蒸蒸然歷稽宣正而下生聚日久而報徵額者日益損儻亦司牧者寬卹之仁不欲以增戶蒙賞邪第輓近應募成風恐

生消耗之漸戶拘成額未免不均之嗟誠加意勞來
杜其奔竄撫其流移而均節其勞逸庶幾哉使民安
土重遷敦龐淳固而阜成日可冀也

訂入編戶論
二則補後事

徐榘曰夫治平在庶功興庶功興在事
役均事役均在民數周故民數者爲國之本而庶事
之所自出也周禮司民掌登萬民之數自生齒以上
皆書於版歲登下其死生三年人比以萬民之數詔
司寇司寇獻其數於王王拜受之登於天府如此其
重也聞之上古之世民各安其居樂其業車馬不疲

罷於道路萬民不失命於寇戎豪傑不著名於圖書
不立功於盤盂七十以上上所養也十五以下上所
長也十六以上上所彊也則民數之蕃庶滋殖豈非
其累世所休養致然哉逮至漢唐叔季菑害生而兵
凶作丈夫從軍旅老弱轉糧饑戶版之紀綱罔轉土
斷之條約不明富人多丁者爲宦學釋老以免責而
下戶殘瘁率迓爲浮人而土著益寡則其弊不在官
而在民長吏以增戶闢稅爲課績而各招浮蕩析實
戶張虛數以邀譽諸死徙闕稅者抑配于土著而土

著益困則其弊不在民而在官自昔歎之矣而今之弊則不在民不在官而在邊徼令邊與邑爭民民走集如市亦極敝已○漢初海內殷庶丁男三年而一事民算四十無賦算口錢自武帝征伐四夷重賦於民民產子三歲卽出口錢故民重困其後年二十乃算晉因之而制戶調唐又因之而制身庸立手實法民始生爲黃四歲爲小十六爲中二十爲丁六十爲老歲終州縣督里坊正各具民生死地闊狹課役之數爲計帳以報度支及大曆兵火之後版籍燬散無

復常準而楊炎乃更兩稅以一其制戶無主客以見居爲籍人無丁中以貧富爲差蓋不土著而地斷民始不勝煩弊也宋興以主客分戶至纖悉矣然轉徙無常反恣影射元雜華裔以南北分戶號稱極盛然上溢下漏法爲最弛明令民以戶口自實洪武十四年始頒冊式於郡縣軍民人匠等戶各以本業占籍男子始生登其名於籍日不成丁十六日成丁丁成而役六十而免婦女若不成丁不役十年乃大計生齒老幼存亾而更籍之冊成一以解京餘司府縣各

存其一凡百差科悉由此出無復前代紛更之擾然
洪武間民甫脫湯火而就在席按烏籍人戶二萬八
千九百七十二丁口十四萬三千九百三十三歷成
弘以來戶口宜月積歲滋乃版籍所載戶不及二萬
口不滿八萬則登耗之故可知已自嘉靖兵興徵書
旁午民之揭家而往者由兩畿以及邊徼菽地不有
哀而聚焉不下萬指戶殘於奔竄口斃於殺傷又何
怪其逾損於昔也迨萬曆二十年輪值大造各里報
丁填圖而縣報陞遷未及清覈至里有賠累不堪者

訟諸藩司下其牒於縣二十三年知縣周士英覆加
詳審除虛加無米丁三百五十四丁增有米丁四十
八丁通共實在人丁一萬四千六百五十二丁蓋據
丁產爲宗所豁除者多羸弱下戶逃亾物故之流而
量於有糧人戶酌增數丁以補其闕也然縣之弊大
都患在不均寬狹磽腴不同鄉而同役貧富有無不
同貧而同征奔亾僑徙不同土而同隸強弱衆寡不
同殖而同派丁多家給者以衆輪加輕丁少家寡者
以力單加重又版籍漫漶里胥夤緣爲奸多巧避失

實豪右售賕轉相蔽匿貧弱抑勒輒報科差而里之
 豪有力者藉口差徭名目卽又更賦諸十甲下戶易
 虐使往往陽浮科歛之所出有倍於所徵者相推於
 逃亾死徙而民益蹙矣而成額率不能減莫若推丘
 文莊以田一頃配人一丁之法田爲母人爲子攢造
 之年子隨母而推移豪有力與下戶無有偏注而立
 意不求浮羨斯不致沒民以生耳

舊志另列編戶次
 卷之八今改合此

戶口格

宋 大紹興 元 至正 洪武 永樂 十年 二十 宣德 正統
 中 中 二十 元 年 年 年 年 年 年 年 年

祥符	七年	四年	七年	四年	七年	四年	七年	四年
中	南北戶	人戶	南北戶	人戶	南北戶	人戶	南北戶	人戶
主客	主客	主客	主客	主客	主客	主客	主客	主客
戶	戶	戶	戶	戶	戶	戶	戶	戶
一萬一萬	一萬一萬	二萬八	三萬三萬	二萬二萬	二萬二萬	二萬二萬	二萬二萬	二萬二萬
二千四千	千八百	千九百	一千二千	九千二千	二千二千	二千二千	二千二千	二千二千
六百八百	四十三	七十二	六百五百	四百三百	二百二百	二百二百	二百二百	二百二百
九十二	十	三十一	十九	七十七	七十	七十	七十	七十
四	九	六	二	三	一	五	五	五
主客	主客	主客	主客	主客	主客	主客	主客	主客
丁	丁	丁	丁	丁	丁	丁	丁	丁
二萬二萬	五萬五	一十四	二十一	十九	九萬六	萬同上	萬同上	萬同上

義烏縣志

卷之七

戶口

五

四 六 八 十	六 八 十	四 六 八 十	萬曆十九年	九年	行賦	役冊	戶	一萬同上民戶一萬四千四百	五千九十七	軍戶三百二十
			二十三年	九年				同前		
			天啓	七年				同前		
			崇禎	四年				同前		
口二	萬一	百四	十四							

六百六	校尉力士戶三	匠	一千	府志
一十戶	五百六十八	機戶七	同前	
十六	捕戶三十五	紙	同前	
戶四	審竈戶七	醫戶	同前	
八	廚戶二	馬站戶八	同前	
十	土工戶四		同前	
丁口			七萬同上	
一千			同前	
			七萬同上	
			一千	明末

市	鄉	民	成	丁	市	民	鄉	丁	市	民	鄉	丁
六十口	一千三百六	十三口	四千五百三	十一口	六十口	一千三百六	十三口	四千五百三	十一口	六十口	一千三百六	十三口
六十口	一千四百口	六十六口	四千六百七十四口	三十四口	六十口	一千四百口	六十六口	四千六百七十四口	三十四口	六十口	一千四百口	六十六口
	清出三十七口	清出六口	清出一百									

十四按丁口額大損於前者前此之多寡以民數之盈耗後此之贏縮以丁糧之饒減也

國	朝	戶	口	國	朝	戶	口
四百	九十	四	一萬六千二	四百	九十	四	一萬六千二
四百	九十	四	一萬六千八百二	四百	九十	四	一萬六千八百二
戶丁	萬四	千五	百三	戶丁	萬四	千五	百三

順治十四年康熙四年
頒賦役全書
頒賦役簡明全書

自萬曆十九年至此並同
歷載黃冊

六年丈量

內清出五百

無可稽紹興中行經界嘉定十七年行體量簡踏法
元至正間履畝籍之明洪武十九年遣國子生臨縣
將各鄉田土經量編畫魚鱗圖以記一清飛灑詭寄
昏賴推那之弊歲久冊失田經屢易糧亦遞推護奸
構訟至嘉靖間而極萬曆初行文量知縣范雋履畝
清丈以等則數多里胥得上下其手乃就縣田之八
鄉以一法量之民田重者畝不及四升輕者三升有
奇步算明而虛糧賠累之弊汰獨高田與水田變舊
則而同科如同明等鄉高田尚少永祈二鄉水田十
一而高田八九終歲之勤不供糧役民多遠竄蓋舊
則分水平高三則尚未詳盡彙而一之是與隆慶二
年慶元之丈一例定稅同病也至崇禎九年有倣萬
曆魚鱗冊式清號之令未經履畝旋且中輟黠吞重
畝孱浮虛號

國朝順治十一年續報陞科十四年頒行賦役全書合
續陞爲額康熙三年遵行文量知縣孫家棟徧行清
丈官民僧額間有增出四年簡明全書今丈出爲額
六年實額因之三十年歲當編審知縣王廷曾一遵

連四單以為收除

單內填入字號畝分一給受者一給出者一給圖書一存公署縣

版籍六隅八鄉鄉之都二十八都之圖一百四十六
豫將各戶田土糧額臚列曉諭聽細戶自行配搭示
日當堂唱名挨審丁照丘文莊舊法以畝為計田之
有收無除者責令即除不累空戶有除無收者責令
即收不容隱占一戶而分兩戶以逃差者使合數戶
而并一戶以坐役者使分飛灑浮零積承陷糧之害
者豁其受陷之數以窮架陷之原前此清丈止丈出
田一項二十畝有奇地八十四畝有奇山一項四畝

有奇塘一項一十七畝有奇而公正每都四人私將
溢丈共四百餘頃歸入已戶民增溢出之糧而公正
席無賦之產悉令面相質對一一清出又將見徵柳
條上屆底冊并收除數目逐一詳問拙言辭者使其
傾吐利口者勿俾飾辨里凡十戶糧多者為頭戶職
催徵應比強者不得爭認馴者不得諉辭次多者次
之手自點定舊有挨戶稅之弊聽圖書開報某某買
田實未買也保正因而行催某乃填契而稅是為擇
肉前署事同知常光裕諭同詳革又每圖向有殊價

銀十兩陋例通詳禁革圖書里蠹諸弊一清舊志作則壤載入科則茲將科則歸貢稅并摘田賦論以田土名之

田土格

宋 嘉定十七年 元至正間

十四年

官	三千九百八十	四千二百五
民	六頃二十畝一	十六頃五十
田	角三十三步	七畝三角五
土		十三步四釐

浙東廉訪使董守愨
僉事余闕以田多失
實議根括田稅使民
隨田受役乃命婺州
路總管督諸縣練習
田事之人履畝而覈

雜一萬五百九十
產一頃九十八畝

之其定著為籍有流
水有類姓有鼠尾今
皆莫之考邑人王禕
著均役記

七毫

三角一十四步

明 洪武二十四年

永樂元年 十年
年造黃冊

官	八千七百三十九頃六分同
民	八釐 府志總額與田地塘
田	田四千五百九十一頃
土	八十畝六分五釐
地	地一千七百六十六頃

先是申
報田土
稅糧省
府縣不
相通多
失實及
空印事
起受罪

者眾至
是分遣
監生躬
臨各縣
履畝經
量編畫
魚鱗圖
冊記之
歲久無
存

九十一畝五分七釐

山一千七百四十五頃

四十一畝五分一釐

塘六百三十四頃八十

六畝九分五釐

官房屋一千一百六十間一千五百九十

四分一釐 二間四分六釐

宣德成化八年黃冊

弘治十年十五年

官冊黃同八千七百四十一頃三十同

同

民田土

畝五分府志總額與地塘小異

田四千五百九十二頃

四十六畝三分五釐

地一千七百六十八頃

四十四畝二分三釐

山同洪武二十四年

塘六百三十四頃九十

八畝四分八釐

官房屋一千五百九十二

文量知 是年至

縣鄭錫 嘉靖三

文僉選 十一年

監保字 八造黃

長及書 冊並同

算弓手

人役履

畝丈量

備造流

水冊籍

京師府

縣各存

一木都

圖糧里

亦各收

一本錢

糧易於

清理爭

間四分六釐

訟易於稽察

嘉靖四十一年黃冊

隆慶六年黃冊

官八千七百四十一頃三十三畝六分

同年前二年同

民田二百六頃三十六畝八分六釐

惠峯寺田 原沒官田 歇役田 續

科田 官買田 官員職田 新沒官

田 民義莊田 官義莊田 縣職田

學院水田 學院平田 學院高田

白雲宗田 沒官田 漲沙田 支

使廳田 養濟院田 舊志見舊則

地八十一頃三十三畝一分五釐

學院地 沒官地 秋租地

山四十三頃四十八畝四分七釐

學院山 沒官山

塘三十三頃七十一畝七分七釐

學院塘 沒官塘 秋租塘

民田四千三百八十六頃一十四畝四分

崇德鄉田四百六頃一畝四分九釐

縉雲鄉田五百八十九頃三十一畝二

分五釐

龍祈鄉田四百五十五頃六十三畝三

分一釐

永寧鄉田六百六十八頃一十九畝八

分一釐

智者鄉田七百一十二頃二十四畝七

分五毫

同義鄉田七百四十六頃四十三畝九

分八釐

雙林鄉田四百八十二頃四十二畝七

分四釐

明義鄉田二百五十二頃二十六畝二

分五釐五毫

地一千六百八十七頃八畝七釐

山一千七百一頃九十三畝四釐

塘六百一頃二十四畝八分八釐

官瓦草屋一千五百九十二間 府志小異

民瓦草屋一十萬六千一百九十間

萬曆九年丈量

丈九千一百三十八頃四十六畝六釐五毫

崇禎九年

同

實官田

地

山

僧塘 竝同前

實額民田八鄉共四千三百四十八頃八畝三分八毫

崇德鄉田今量四百一十一頃二十八畝

三分四釐七毫

縉雲鄉田今量五百九十二頃二畝四分

一釐

龍祈鄉田今量四百七十一頃二十二畝

六分四釐三毫

永寧鄉田今量六百七十一頃七十五畝

九分三釐三毫

智者鄉田今量七百一十五頃四十四畝

六分四釐八毫

同義鄉田今量七百三十六頃二十五畝

四分五釐一毫

雙林鄉田今量四百九十七頃二十三畝

九分六釐

明義鄉田今量二百五十三頃八十四畝

九分一釐六毫

僧田共七十二頃一十畝三分二釐五毫

前此無僧田豈將惠峯寺白雲宗次作僧田邪

民地共一千七百一十八頃七十三畝六

分

民山共二千一十九頃九十三畝五分六

釐三毫

民塘共六百一十四頃六十七畝一釐九

毫

國 順治十一年十四年頒行賦役全書

朝 田原額四千

六百二十六

頃五十五畝

四分九釐三

毫

續田地成七頃合續四千六百三十三頃六十六畝七

報一十一畝二分七釐六毫六絲八忽

陞分八釐三毫官田同明嘉靖四十年

科六絲八忽民田崇德鄉

縉雲鄉

龍祈鄉

永寧鄉

智者鄉

同義鄉

雙林鄉

明義鄉並同萬曆九年今量

僧田同萬曆六年

陞科田地成田六頃六十六畝三分六絲八忽山成田一十一畝二分塘成田一分沙成田三十三畝六分八釐三毫

地原額一千八百頃九畝

七分五釐

陞地山成一十合續一千八百一十四頃六釐二毫

科三頃九十畝官地同嘉靖四十年

三分一釐二

民地 同萬曆九年

毫

陞科地 山成地九頃六十一畝九分五釐三毫沙成地四頃二十

山原額二千

七畝八分三釐九毫塘成地五分二釐

六十三頃四

十二畝三釐

三毫

陞山一頃二十合續二千六十四頃六十六畝五分八

科四畝五分五釐三毫

釐

官山 同嘉靖四十年

民山 同萬曆九年

陞科山 沙成山

塘原額六百同

四十八頃三

官塘 同嘉靖四十年

十八畝七分

民塘 同萬曆九年

八釐九毫

康熙三年丈量

四年頒行簡明全書

原額 見順治十四年

原額陞科并

丈

丈出官民僧

出

田一頃二十畝三釐九毫一絲九忽

官田

原額同嘉靖四十年

丈出一畝四分八毫

六絲

田地山塘共

九千一百六

十四頃九十

九畝二分三

釐六毫六絲

七忽

同

民田

原額同萬曆九年

崇德鄉丈出二十七畝五分四釐三

絲

縉雲鄉丈出九分九釐九毫五絲

龍祈鄉丈出一十六畝二釐四毫

永寧鄉丈出一十畝一分五釐九毫

六絲

智者鄉丈出三畝四分四釐八毫八

絲七忽

同義鄉丈出一十一畝九分一釐五

毫三絲

雙林鄉丈出八畝六分四釐二毫

明義鄉丈出一十一畝二分六毫

僧田

原額同萬曆九年

丈出九分二釐八毫

五絲

陞科田

原額同順治十一年

丈出二十八畝四

分六釐六毫五絲二忽

六年丈量

實

丈出一頃二十畝七分三釐九毫一絲九忽

實該田四千六百三十四頃

田

八十七畝五分一釐五毫八絲七忽

官田

丈出一畝四分八毫六絲

實該田二百六頃三十八畝二

分六釐八毫六絲

僧田

丈出九分二釐八毫五絲

實該田七十二頃一十二畝二

分五釐三毫五絲

民田崇德鄉

丈出二十七畝五分四釐三絲

實該田四百一十一

頃五十五畝八分八釐七毫三絲

縉雲鄉

丈出九分九釐九毫五絲

實該田五百九十一頃三畝

四分九毫五絲

龍祈鄉 丈出一十六畝二釐四毫 實該田四百七十一頃三十

八畝六分六釐七毫

永寧鄉 丈出一十畝一分五釐九毫六絲 實該田六百七十二頃

八十六畝九釐二毫六絲

智者鄉 丈出三畝四分四釐八毫八絲七忽 實該田七百一十五頃

四十八畝九釐六毫八絲七忽

同義鄉 丈出一十一畝九分一釐五毫三絲 實該田七百三十六頃

三十七畝三分六釐六毫三絲

雙林鄉 丈出八畝六分四釐二毫 實該田四百九十七頃三十

二畝六分二毫

明義鄉 丈出一十一畝二分六毫 實該田二百五十三頃九十

六畝一分二釐二毫

陞科地成田 丈出二十八畝四分六釐六毫五絲二忽 實該田七頃三

十九畝七分五釐二絲

實 丈出八十四畝二分六釐一毫九絲 實該地一千八百一十四頃八十

地四畝三分二釐三毫九絲

官地 丈出二畝七分八釐三毫三絲 實該地八十一頃三十八畝

出

九分三釐三毫三絲

民地 丈出七十六畝
四釐九毫七絲 實該地一千七百一十九頃

四十九畝六分四釐九毫七絲

陞科山成地 丈出五畝四分
二釐八毫九絲 實該地一十三頃九

十五畝七分四釐九絲

實 丈出一頃四畝
八分九釐四絲 實該山二千六十五頃七十一畝四

山分七釐三毫四絲

官山 丈出一畝八
分九釐八毫 實該山四十三頃五十畝三分

六釐八毫

出丈合

民山 丈出一頃五分
九釐二毫四絲 實該山二千二十頃九十四

畝一分五釐五毫四絲

陞科山 丈出二
畝四分 實該山一頃二十六畝九分五釐

實 丈出一頃一十七
畝一分三釐九絲 實該塘六百四十九頃五十五畝

塘九分一釐九毫九絲

官塘 丈出二畝七
分九釐二絲 實該塘三十三頃七十四畝五

分六釐二絲

民塘 丈出一頃一十四
畝三分四釐七絲 實該塘六百一十五頃八

十一畝三分五釐九毫七絲

義島系志

卷之二

田土

三

實額 合原額 官民僧田地山塘共九千二百

六十四頃九十九畝二分三釐三毫六絲七忽

文政癸未

